

MASONGOLA A MWANAMUKOKO



Nakusachila, Mulongo Edmonds. Nkambo akupeshe.

Muji byepi mabaanga a bufuku, balunda. Kine ke jishuko jikwabo bufuku buno kwikala muno mu Fellowship Tabbanako. Kimye kyo Najikupita kwipi, mabaanga ano, ne kutala po yajinga, Kabiji Najikumona kyambo kya “Fellowship,” kyaji kungwamina bingi bulongo. Natemwa kyokyo, Mulongo Edmonds. Lumvwang’ano lwa bupopweshi, akyo kyo twaketekelamo.

² Mulunda nami wakala, ao wayatu ku muzhi na kwikala ne Nkambo, anweba bavula mwakonsha kumuyuka, Dr. F. F. Bosworth, anweba bavula. Aye wajinga muno mu Phoenix, Naketekela, ne amiwa kimye kimo, mweo wabukilobo bingi. Kabiji aye wajinga . . . wajinga na—na . . . Aye wajinga muntu wazhila mukote, bino wajinga na maana a bisela. Kabiji aye wang’ambijile mba, kimye kimo, waambile mba . . . Natwajijiletu na kwamba pa lumvwang’ano lwa bupopweshi. Kabiji aye waambile mba, “Mulongo Branham, wayuka lumvwang’ano lwa bupopweshi byo luji nyi?”

Naambile mba, “Kyawama, Nalanguluka mba ibyo, Mulongo Bosworth.”

³ Aye waambile mba, “Ke balongo babiji baji mu bwato bumo.” Nanchi, kabiji akyo kijitu bulongo, kushilang’ena kibamba umo na mukwabo.

⁴ Kabiji Namona bavula mwasutula maboko enu, a kuyuka Mulongo Bosworth. Byokiji mba—mba mwamuyukile, Nasaka kwamba kyambo kimo kya pa kimye kyanji kyapeleleko pano pantanda. Namuyukile kimye kyabaya. Kabiji aye wajingako na kusapwila Mamboawama ne kulombelela bakolwa, Amiwa kasa kyangye kusemwa ne. Nanchi mwakonsha kuyuka myaka yanji yo ajinga nayo. Nkambo wamulekele kwikala na bumi, Nalanguluka mba, pepi nobe myaka eite-faivi, kintu kiji byobyoyo, kabiji wajingatu mwanamulume kilobo kimye kyo afwile.

⁵ Kimye kyo ajinga sebete-faivi, Naketekela byo kyajinga, aye ne Amiwa twajinga ku . . . Naketekela, ku Edgemont Hotela ku Miami. Kabiji twajinga na—na kajo ketu ka mulajilo, kabiji twaendele kuya ku kitulu kya kalunga ako kwaishilenga manyaki, na kumona kusela kwa ng’ondo. Kabiji byo Najinga, pepi nobe myaka foote, bipuzhi byami byakukuluka, na kwenda byobya. Kabiji aye, pepi nobe sebete-faivi, wajingatu waoloka byonka byo afwainwa kwikala. Kabiji Natajile pe aye, kabiji Namukomokele bingi. Kabiji Naambile mba, “Mulongo Bosworth, Nasaka kukwipuzha jipuzho.”

Aye waambile mba, “Yangatu kulutwe, Mulongo Branham.”

Kabiji Naambile mba, “Kimye ka kyo wajinga na buwame bobe?”

⁶ Aye waambile mba, “Ponka pano.” Kyawama, nanchi, Naumvwine buvu amiwa mwine. Kabiji aye waambile mba, “Anweba mwalubako mba Amiwa ne mwanyiketu, waikala mu nzubo yakala,” byo aambile. Kabiji ao wajinga Mulongo Bosworth.

⁷ Byo Naumvwine mba ubena kuya nakukumanya Nkambo, Najingatu pepi kunsoka mataila a ku motoka wami, kuya ku Miami, na kumumona. Kabiji bakazhi ne Amiwa byo twafikile kokwa . . . Kabiji kisemi kya kwa Bosworth ne kisemi kyetu twaikala bulunda bwabaya bingi. Kabiji twatwelele mukachi. Mushakulu wakala walala mu kamwanya kakacheche. Kabiji waimenye, mutwe wanji mucheche wakipala, acheche, maboko anji anyana asutwilwe nkukwata amiwa, nobe *byobya*. Mipolo yatatwile kupita pa mabuta ami. Namukwachile mu maboko ami, kabiji Najijile, “Ba taata, bataata, makalaki a Isalela ne bambili babo!” Mambo, inge kwajingapo muntu mukulumpe wabikile muneema mu ng’endo ya Pentekosito, wajinga Mulongo Bosworth. Aye kine byo ajinga. Aye wajinga jiluba jikatampe.

⁸ Kabiji mwayukatu, kintu kitanshi kyo akebanga kuuba, ke kwambapo kakisela kacheche, byobya, mwayukatu.

Kabiji Naambile mba, “Mulongo Bosworth, usa kwikalatu bulongo nyi?”

⁹ Aye waambile mba, “Ine, Mulongo Branham. Amiwa kechi nakolwa ne, kyakutatwilapotu.” Aye waambile mba, “Amiwa mbena kuyatu ku Nzubo.”

Naambile mba, “Kyawama, akyo kyawama bingi.”

¹⁰ Atweba po twafuminetu mu mwingilo ku Africa, aye ne Amiwa. Aye waambile mba, “Amiwa naikala wakota bingi wakutwajijila kwikala na bumi kimye kyabaya.” Aye waambile mba, “Amiwa mbena kuya ku Muzhi.”

Naambile mba, “Mulongo Bosworth, usakunkwasha ngube byepi?”

¹¹ Kabiji aye waambile mba, “Ikala na Mamboawama.” Kabiji waambile mba, “Bwela mu mwingilo lubilo monka mo wakonsha kubila.” Waambile mba, “Abo bwakonsha kwikala bunkwashi bwami.”

¹² Kabiji Naambile mba, “Mulongo Bosworth, kintu kimo kikwabo kyo Nakonsha kutemwa kukwipuzha.”

Aye waambile mba, “Kyo kika, Mulongo Branham?”

¹³ Naambile mba, “Pano, waingijila Nkambo pepi nobe myaka sikisite, mu mwingilo, nangwa kape kukilapo.” Kabiji Naambile

mba, “Kimye ka kyo wajinga na lusekelo lwabaya bingi mu bumi?”

Aye waambile mba, “Ponka pano.”

Kabiji Naambile mba, “Mulongo Bosworth, wayuka mba ubena kufwa nyi?”

¹⁴ Aye waambile mba, “Amiwa kechi nakonsha kufwa ne. Nafwile myaka yavula yapitapo.” Kabiji Na...Aye waambile mba, “Mulongo Branham, bonse bo Natemwa ne bo nasakamene pa myaka sikisite yapita kunyuma, Amiwa mbena kumupembelela Aye kunshikula kibelo pa kimye kiji kyonse ne kwiya, na kusenda.”

Nalanguluka pa kyokyo, *Salamo Wa Bumi*:

Bumi bwa bantu bayakuwa bwituvulula
Twakonsha kulenga bumi bwetu kwikala
bwawama,
Nantampulo, yashala kunyuma kwetu
Ngayo pa busenga bwa kimye.

Kabiji kine aye washa ngayo, kwi amiwa.

¹⁵ Kasa akyangye kufwa, nangwa, pa-...wayile mu Lukumo, pepi nobe awala umo, nangwa kape kukilapo, kasa akyangye kufwa ne, aye wajinga nobe walala pa maawala acheche, kabiji bakazhi banji, baana banji, batemwe kasa baimana kuzhokoloka, kabiji awa mukote wabukile, wakeketele kuzhokoloka, wabukile, kabiji wanyemene kukilang'anya mu nzubo, ne kwiimuna ne bainanji abo bayile pa myaka yavula bingi, ne bashanji. Kabiji kukila pa awala umo, wi imwene maboko na bantu, na kwamba mba, “Awe ye Mulongo Yoano. Ee, obewa wayishile kwi Kilishitu mu mbung'eno yami ku Joliet, Illinois. Awe ye Mulongo...” Kwiimuna maboko na bo aitabizhe bafwile kala, pa myaka yavula.

¹⁶ Amiwa—Amiwa ne mubuula, kimye kimo Naketekela mba mu kimye kyo tubena kupita panopantanda ne kuya ku ikwabo, Naketekela kimye kimo inge...Mukola ukekala wakatazha kwabuka, nangwa byonkabyo, mwayukatu. Naketekela mba kapepo Nkambo waamba ku batemwe betu mba, “Yainga ku mukola na kwibakumanya kokwa.” Nobe byonka byaambile Yakoba, tukapwila pamo na bantu betu juba jimo.

¹⁷ Ne amiwa mbena kupembelela joja juba kufika. Kabiji inge Napwisha na buno bumi, nangwa Lesa wapwisha ne amiwa kuno, kabiji Namona mba Nasenda bukikizhi bonse bo Nafwainwa, ne kupita pa miba yonse, kabiji ne kukajila kantumbatumba konse, Nakeba kutala lunyuma, ne kumona konka ko Najinga, Amiwa byo kafika ku mukola.

¹⁸ Amiwa kimye kyonse ng'amba mba, nobe balunda bachiluluka kuno, baji na lwimbo mucheche ye bemba, “Amiwa

kechi nkeba lukatazho pa mukola ne.” Nakeba kwibitana byonse kasa byaoloka.

¹⁹ Kapepo nabika mpoko mukiswi, ne kufumyako kimpopo, ne kwitula panshi ku busenga bwa kukalunga, ne kusutula maboko ami, ne kubijika mba, “Letai bwato bwa bumi, Taata. Amiwa mbena kwiya kumuzhi lukeelo luno.” Aye ukekala konka. Kechi musakamane ne. Naketekela kyokyo. Naketekela mba ayo yo nkebelo ya michima yetu bonse.

²⁰ Pano, ke jishuko bingi ja kwikala muno bufuku buno na yuwe kafunga ne kipwilo kyanji, kabiji ne yuwe mwingilo wawama, kabiji ne babo babena kwenda mwi Kilishitu, kuno ku mpelo ya Phoenix. Mambo, kyakine, twi bakang’enda. Twi bakang’enda ne benyi muno. Tubena kukeba Muzhi.

²¹ Nobe byo Najikwambanga lukeelo luno ku tabbanako wa kwa Mulongo Fuller, pa Lukunwa Wazhila. Pano, inge muji na matepu lekonda, Amiwa kechi neatongolapo ne. Bino kwajinga kintu kimo kyajikumweka lukeelo luno, kyo Na . . . Inge muji na tepu lekonda, inge mwatambula umo wa matepu, Naketekela mwafwainwa kwikisachila. Mulongo Maguire uji nao, kabiji *Awa Lukunwa Wazhila Wakwa Abulahama*.

²² Monai, Lukunwa wakwa Abulahama wajinga Izaka, ao ke Muyudeya, wa ku mubiji. Pakuuba Lukunwa Wazhila wajinga Kilishitu, kupichila mu mulaye, kabiji awa Kilishitu wajinga Kyambo kya Lesa kyasololwa. Kabiji kiji mu muchima wetu leelo nobe byonka . . . “Inge Ami . . . Mwakalai mwi Amiwa, kabiji Kyambo Kyami mwi anweba, nanchi ipuzhai kyonse kyomukeba, kabiji kikemubilwa.”

²³ Pano, Nanji kwamba kyokyo, ku Phoenix, bimye byavula kufuma kimye kyo Najinga kuno . . . Kimye kyami kitanshi kyajinga myaka sate-faivi yapitapo. Kabiji kufika ne pa wabu 16 ne Henshaw, Naikeleko, naingijile pa Circle R Ranch kokwa, akwa ku Wickenburg. Kabiji naileko na nsongwakazhi mucheche konkwa ku wabu 16 ne Henshaw. Naile na kukeba kifulo juba jikwabo, kabiji kechi ikiji Henshaw ne jikwabo ne. Ke Buckeye pano. Kabiji ke muzhi mukatampe monka mukachi ka mpuzha ya Phoenix kuno. Bintu byonse byapipulwa bingi.

²⁴ Kabiji mukazhi ne Amiwa naile ku Mutumba wa Kabeta kabulenge, na kutala kunyuma ya Phoenix. Nalangulukile mba, pepi nobe myaka fili aduleendi yapitapo, kapepo kechi mwajinga bintu muno ne kanatu banyama, bukusa, ne bintutu bikwabo. Kabiji pano ke muzhi wawama mukatampe. Pano, Naambile mba, “Mutemwe, bushe wapipulwa nangwa watwaalwa mungi? Obewa wakonsha kwingijisha nsambu yobe ya kusalulula. Kwi amiwa, watwalwa mungi. Mambo, abye binshimikwa bikatampe ne binshimikwa byawama byafwainwa kwikalatu bulongo inge banabalume ne banabakazhi babena kwenda-uka-mu mikwakwa, na maboko abo asutulwa kwi Lesa, na kutakaika

Lesa, kabiji balongo ne banyenga babena kwikala bwikalo bwapashako; mukifulo kya kutoma, kuteya ngyuka, kupepa fwaka, kubepa bubela, ne kwiba, kisangajimbwe kya maalwa, ne bintu byonse byabubi. Pakachi ka byonse bye, nangwatu. . .”

Pano mukazhi wang’ambijile mba, “Nanchi, Billy, kyo waishila kuno kika?”

²⁵ Naambile mba, “Bino, mutemwe, kufuma po twaikela muno, mamineti fifitiini, bubela buunga bwabepwa muno mu kipachiko? Luchipo luunga lwaubiwa, ne Jizhina ja Nkambo kyatutu? Mishanga inga, kutoma ma wisiki kuunga, bukende buunga bwaubiwa, kabiji kupita moomwa, pa kyonkake kinye kicheche, kyo twaikala kuno?”

Aye waambile mba, “Bushe akyo kechi kyatama nenyi?”

²⁶ Bino Naambile mba, “Akye kyo kintu kyo twaikela kuno, mutemwe. Milombelo inga ya bukishika yalombwa kufuma po twaikela kuno? ‘Obewa wi Kyeya kya panopantanda.’ Akyo kyotwaishila kuno, na kibika pamo bipuzhi byetu na bibye bipwilo bicheche biju kuno, ne kuuba kiji kyonse kyo twafwainwa kuuba, mu kukwasha mba byende kuya kulutwe. Kwikala. . .”

²⁷ Anweba bonse, anweba bazhijikwa, anweba mwi mapesho kwi amiwa. Naketekela mba Amiwa kekala jipesho kwi anweba, pa kupepula kuno. Kabiji Ami, byo Naishile kutana mba Nafwainwa kupepula madinominesheni apusanapusana ne tubungwe, kabiji—kabiji ne bipwilo byapusanapusana, kabiji ne bikwabotu, balongo kupita mu Kipachiko kya Phoenix kuno, muchima wami wajinga bingi nalusekelo. Ako kubena kwiya mbung’eno yo Nkasapwilapo kasa ikyangye kufika ne, pa mbung’eno ya Bantu Basulu Benakilishitu ibena kwiya, Naketekela mba, kajo ka lukeelo ka kwiaula Pakibelushi, kabiji apa ne mbung’eno ya Pamulungu mute, ikalondelapo, ja Pamulungu jalondelapo. Kabiji kinye kyonse ke jishuko ja kusambakana na booba balongo. Naketekela mba baji na bipona pepi nobe tweti-faivi aduleendi kokwa. Kukekala puzha yabaya bingi pa kwikala atweba bonse. Kabiji twaketekela mba tukasambakana konka kwa.

²⁸ Kabiji pano kwikala na kino kinye kya lumvwang’ano lwa bupopweshi, kuya kufuma ku kipwilo kimo ne kuya ku kipwilo kikwabo, na kwamba. Naketekela mba Nakusapwila lukeelo luno poso Nasapwila jwi janshika, pepi nobe awala umo na afu. Kabiji abwa bwajinga bwaipipa bingi. Amiwa bimye byavula kechi ndupuka kasa ikyangye kufika maawala fiili nangwa foolo ne, ku—ku kipwilo ku muzhi. Amiwa. . . Amiwa kechi ne musapwishi ne. Nanchi Amiwa—Amiwa nguba kyongo kyalusekelo kwi Nkambo. Natemwa kwikyuba bulongo. Na—Naketekela Amiwa ne kitemwa, nanchi Amiwa twajijilatu na kwikyuba. Naikala. . . najinga na ng’ambilo foolo nangwa faivi yapusanapusana yo Mbena kukwachijila bantu balupuka kinye

kyapwa, nanchi Nayuka mba akyo kya kine. Kabiji bufuku buno, kya bukine, tusakulupukamo wanu koloko kasa ikyangye kufika ne. Amiwa, Amiwa nsakupana lolu lutetekelo. Amiwa njitu, pepi. . . Ke ng'umvino yawama bingi ya mupashi, kabiji bintu byonse byawaina, Amiwa kine Mupashi Wazhila ukapana mapesho kwi atweba.

²⁹ Pano, pano Amiwa kechi ngikalapo na mpwijilo ya lubuko mu mbung'eno yami ne. Amiwa. . . Bufuku bumo, akwa ku mulongo. . . Jizhina ja Yesu, kafunga wajinga ng'anyi? Mulongo Outlaw. Mulongo Outlaw ku kipwilo kyanji, kwajinga bavula bingi bakebelenga kulombelelwa. Kabiji Najinga na mwanami na kupana bitupa bya milombelo. Kabiji pano mafuku apitapo, Mupashi Wazhila waponene mu kishimikwa, poso. . . Anweba bonse mwayuka. Anweba mwatanwako mu mbung'eno yami. Anweba bonse mwauba kala. Mumona kuyuka bapashi, ne bikwabotu. Bino pano Namona babena kuvujilako ba kulombelela. Kabiji Namwene mba mutanshi, kutatwila Pakisatu ne Pakina. Nalangulukile mba Nsakupembelela poso kupita Pamulungu, mambo inge muji na mpwijilo ya lubuko mu kipwilo. . .

³⁰ Mwamona, Na—Nabijikile konse konse ko Naile amba muntu yense ekale pa kifulo kyaji kya mwingilo Pamulungu, mwamona. Aye mbung'eno yapusanako ke yakwipempulatu na balongo. Kabiji atweba—atweba tubena kukeba muntu yense kulama kifulo kyobe kya mwingilo, mambo kafunga wenu ubena kwimupembelela, kabiji apo po wafwainwa kwikala.

³¹ Nanchi pano—nanchi Nalanguluka mba, keesha bufuku, inge Nkambo waswa, Amiwa kechi. . . Kwepi ko tukekala keesha bufuku? [Mulungu umu waamba mba, “Akwa ku Tempe, ku kipwilo kya Mulongo O'Donnell.”—Waku.] Mulongo O'Donnell, ku Tempe, Arizona. Pano, inge kechi mujipo—na kintu kimo kyapusanako kibena kubiwa pa kipwilo kyenu ne, kabiji muji na bantu bakolwa, kika, Amiwa kalombelelanga bakolwa, keesha bufuku, kwikalatu na mulaini wa milombelo ya kimye kyonse, kulombelela bakolwa, kapepo—kapepo Pakimo, Pakibiji. Twayai tumone, Amiwa nafwainwa. . . Amiwa. . . Oo, Njina. . . Bushe Njina kipwilo Pakisatu bufuku ne apo nyi? [“Ee.”] Pakisatu bufuku. Nanchi kya. . .

³² Kabiji yatatwila Pakina, abyo ibyo, mbung'eno? [Mulungu umu waamba mba, “Amiwa nji na bintu. . . ? . . .”—Waku.] Kijitu bulongo, mulongo. Aye usakubijika ponkapano. [“Monai, tuji muno bufuku buno. Kabiji keesha bufuku tukekala pa Tempe Assembly of God. Kabiji pano pa Moutain View ku Sunnyslope pa tweti-fiili. Kabiji pano pa Central Assembly pa tweti-foolo.”] Kijitu bulongo, akyo kyawama. [“Amiwa kechi nakonsha kuvuluka ne, amiwa mwine. Nalubijilemo nakyokyo.”] Kechi mulanguluke pa kyokyo ne.

Naambilenga juba jikwabo, pepi nobe, “Kechi nakonsha kuvuluka ne.”

³³ Kabiji Mulongo Jack Moore waambile kwi amiwa, mba, “Walanguluka mba watama nyi?” aye waambile.

³⁴ Naambile mba, “Mulongo Jack, Amiwa mbena kwamba, bino kechi Nakonsha kuvulukatu kyo Naambilengapo ne.”

³⁵ Aye waambile mba, “Kechi ulanguluke mba akyo kyatama ne.” Waambile mba, “Naita pa foni, muntu umo, waamba mba, ‘Kika kyo ubena kukeba?’” Kyawama, akyo kibena kuya nakutama bingi! . . . ? . . . Oo!

³⁶ Nanchi, ami, akyo kyafwainwa kumvwanika nobe kuseksha, akyo kyo nalanguluka mba kechi kyawama kwamba kuno ku pulupiti ne. Bino baana bakwa Lesa bekalatu balusekelo, nangwa byonkabyo, mwayukatu, nanchi atweba—twatemwa kuuba. Nalanguluka kuuba mba akyo kyakonsa.

³⁷ Anweba bonse, anweba bavula, mwamuyuka Mulongo Jack Moore. Aye wa ku Shreveport, Louisiana, Bumi Tabbanako, ke mulongo wawama bingi. Kabiji aye wambujilenga kyokyo. Aye ke nsendwe wamingilo, ne apo.

³⁸ Aye waambile mba, “Kechi ulanguluke mba akyo kyatama ne, Mulongo Branham.” Waambile mba, “Naichile muntu umo juba jikwabo, ne kutumina pa nambala yabo.” Kabiji waambile mba, “Bakumbwile, ne kwamba mba, ‘Alo.’ Naambile mba, ‘Kyawama, ubena kukeba ka?’”

Nalangulukile mba, “Kyawama, akyo kibena kuya peene palepa, Mulongo Jack.”

³⁹ Nanchi pano, Nalanguluka mba kyafwainwa kwikala kyawama, kabiji baabo balunda babena kukeba kulombelelwa, ne kuleta balwazhi baabo, nanchi tusa kwibalombelela.

⁴⁰ Pano, bufuku buno, Nalanguluka pa byo Nakonsha kwambapo bufuku buno mu kino kipwilo kicheche kya temwikwa. Nakulanguluka namba, “Kyawama, Amiwa kechi nayuka kine kintu ne.” Amiwa nsakusendatu ka kibaba kacheche, ne kuketekela mba Nkambo usa kumvwangakanya byambo pantu pamo, kabiji kwi kileka kyaponena pantu pamo po kyafwainwa kukwasha muntu umo. Kwikala . . . Amiwa kechi ngeseka kusendatu kibaba ne, Amiwa kimye kyonse ngeseka kumvwa lutangijilo, kabiji ne kunemba Binembelo byavula, ne bikwabotu. Kabiji—kabiji pano, inge Nkambo watangijila byapusanako, nanchi Amiwa ngyatu monka Aye mo atangijila. Kabiji Nalanguluka mba ajo jo jishinda jo twafwainwa kubilamo. Kechi ibyo nenyi? Ubilaitu mu kintu kimo.

⁴¹ Kabiji pano paji kintu kimo akyo—kyo Na—Nakeba, kyonse kipwilo kubijika kikye ku mubiji yense uji mu yooyo mpuzha. Kabiji ko kuuba mba, inge . . . Inge mwapwisha kulombelela

kafunga wenu kabiji ne batemwe benu, kechi mundubeko ne, mambo Nalanguluka mba, pajuba pajuba, kukila pa myaka yonse, namba tubena kwiya kupelo ya mukwakwa.

⁴² Kabiji nafumatu Nakuzhika bamaama, milungu icheche yapitapo. Kabiji ne bakwachile mu maboko ami poso Lesa byo asendele lubesha ne mweo wabo Kwiulu. Namwene lufu lwa yewa kilobo wa mwanamukazhi wayulwa na Mupashi wazhila, kabiji na mumona wafika kupelo ya mukwakwa. Nalangulukile mba, “Oo, Ami—Ami nafwainwa kwikala na maama yense uji byobya. Nafwainwa kubapo kintu kimo pakuuba. . .kubapo kintu kimo kyo Nafwainwa kuuba, pakuuba mba tulete bantu bamone kine kintu byo kyalumbulula.”

⁴³ Kabiji, balunda, Natundaikwa mba kyafwainwa kwikala kyazhikako pacheche. Kabiji Nalanguluka mba twikisenda na kwikiphezha kukila byo kiji. Nalanguluka mba twafwainwa kuvuluka. Inge Lesa wazhila bingi poso ba Malaika bamweka bandochi ku meso Anji, atweba tumweka byepi? Mwamona? Abyo ibyo. Nanchi twakeba kuvuluka. Kabiji vulukai, Lesa waikala amwa mwalepa mu Peenape, amo mwakila ma juba onse kusama pa byobya byenda mulwelele. “Wazhila, wazhila, wazhila,” ba Malaika baji na byapi byazhika pa bilungi byabo, ne ku maulu abo, kasa batumbuka mu Kyeenyi Kyanji, na kujila, “Wazhila.” Twafwainwa kwikala byepi? Nanchi atweba. . . Akyo kyo tweseka kuuba.

⁴⁴ Kabiji—kabiji Naumvwa nobe bibye, Bufumu bwa Lesa, buji nobe muntu wasenda bukonde ne kuya ku kalunga, Yesu waambile mba, wateele bukonde bwanji. Kabiji byo andosele, waipaile misango yapusanapusana. Pakuuba jisabi ja wawama, ne ajo, jalamwewe; kabiji aja jisabi jatama jabwelele pa meema, biji nobe musonka, ne—ne miloolo, misobela, bakovu, ne bintutu bikwabo. Pakuuba bukonde bwa Mamboawama bukwatatu byonse. Kabiji atweba. . .Kukekala juba jimo tukata bukonde bwapelako, Mulongo Adams. Abyo ibyo. Kechi ke obewa nangwa Amiwa kwamba mba jepi jisabi kabiji jepi jabula ne. Atweba kechi twayuka ne. Atweba tutaatu bukonde ne kundosa. Kyo kyonka. Lesa wayuka Bakwanji. “Aba bo Ayukijile jimo, bo Aita; kabiji abo bo Aita, Wibabingisha; kabiji aba bo Abingisha, Aye wibatumbijika.” Nanchi tubena kupembelela, na kutaatu bukonde. Kabiji ke jishuko jami bufuku buno ja kwimana mu kipwilo kya Mulongo Edmond na kukwasha kuteya bukonde pa kino kifulo, na kumona kana kujipo jisabi ajo Lesa jo aji najo ja mu Bufumu Bwanji.

⁴⁵ Pano, kasa tukyangye kutanga Kyambo, twayai twambe ku Nsulo ya Kyambo pachechetu byo tubena kukunyika mitwe yetu.

⁴⁶ Namitwe yetu yakunyikwa, mu buzhile bwa kino kimye, amba tubena kufwenya kwipi ku Kyambo kya Lesa mumi, ao ye Lesa, Nakumya kana kujipo bantu baji muno abo baji na

byakukabila pa michima yabo, abo bakeba kwibavulukako mu milombelo. Kiyukanyikwe kupichila mu kusutula kuboko.

Nkambo Yesu, talai pa jibumba, byo mwayuka muchima yense.

Nakusachila.

⁴⁷ Wakila lusa kabiji Lesa wazhila, Wabulume bonse, El Shaddai, awa wamwekele kwi Abulahama mu Jizhina ja “Wabulume bonse, Lesa-wa kyaji kyamabele, Upana-bulume, Uwamisha bakooka,” iyai kwi atweba bufuku bunu, Taata. Kabiji twavuluka kunekena kwetu ne bilubo byetu. Twisolola mambo etu kumeso Enu, ne kwialajika pa kitapisho Kyenu kya lubemba, kabiji ne kwipuzha Mashu akwa Yesu Kilishitu ebufumyepo, mu kitapisho kyo twalenga. Kiswishai kye, Anweba Lesa.

⁴⁸ Twapana bumi bwetu ne byonse byo tuji nabyo, kabiji ne jonse jitaleta japewa kwi atweba. Nkambo, jingijishai mu kuleta lukumo kwi Lesa.

⁴⁹ Peshai kino kipwilo, ne kafunga wakyu watemwikwa, bakwashi, baketekelwa, kabiji ne bonse ba bbondi, kabiji ne yense membala wiya mu kino kipwilo kyatelwa mba “Lumvwang’ano lwa bupopweshi.” Lesa, Nalomba mba banabalume ne banabakazhi, byo batwela pa kyokya kibelo kya kino kifulo, namba baponene mu kushininwa mambo andoonda yawaina ya Mupashi Wazhila uji mukachi ka kishimikwa. Kiswishai kye, Nkambo.

⁵⁰ Tulekelaike mambo etu, kabiji ne mizhilulwila yetu, twaipuzha jibiji. Vulukai booba baji kusutula maboko abo. Panshi ya kokwa kuboko, Nkambo, pajinga muchima wajikukabilanga kintu kimo kufuma kwi Anweba, kabiji kapepo Anweba yeka mwakonsha kwi kipana. Nalomba mba Anweba musakwikiswisha, Taata. Kyonse kyo bakabila, kipanai kwi abo mukuvula. Inge pajipo bakolwa, Nkambo, babukai. Inge pajipo bamo baponena kwapela jishinda, koseshai yewa, aja jinungo jakokelela. “Jitente ja fumpaulwa, Aye kechi ukejonauna ne, nangwa mfwesho ya kupepelamo Aye kechi wakonsha kwi izhima ne.” Kabiji twayuka mba Aye kechi wakonsha kukana jitente ja fumpwa ne; Aye wakonsha kwi jinunga. Kabiji Nalomba, Taata wa Mwiulu, inge kujiko mipashi yalajika, nangwa—nangwa ya popomenwa, nangwa maboko anekena, kabiji ne manungo anemenwa, alekai asutulwe bufuku bunu, Nkambo. Lekai Mupashi Wazhila eye abuke michima yetu ne mipashi, kabiji ne bumuntu bwetu bwa kumbiji, kabiji tukapana kwi Aye lutotelo lonse. Twikipuzha mu Jizhina ja Yesu. Amena.

⁵¹ Kabiji inge mwafwainwa kutemwa kuzhikula mu Kinembelo, pepi nobe kwamba kwa mamineti-sate, Nakonsha kutemwa anweba kutanga pamo ne amiwa kufuma mu buuku wa

Lumwekesho, kyapitala kyabu 19. Kabiji Nakonsha kutemwa kutanga kufika ne ku veeleshi wabu 7, kunungakanyatu.

Kabiji pakupita bibye bintu Naumvwine jiwi jikatampe bingi ja bantu bavula mwiulu, kasa baamba mba, Aleluya; Lupulukilo, . . . lukumo, ne munema, ne bulume, kwi Nkambo Lesa wetu:

Mambo bukine ne bololoke bo buchibishi bwamambo bwanji: mambo wamuzhachisha awa pite mukatampe, waongwelenga ntanda na bulalalale bwanji, kabiji aye washinkanya nanji na mambo a mashi a bakalume banji aji ku maboko anji.

Kabiji ne jikwabo baambile mba, Aleluya. Kabiji bwishi bwanji bwafutumukile myaka ne myaka.

Kabiji aba bakulumpe tweti foolo ne banyama bana baponene panshi kikuvumene ne kupopwela Lesa waikala pa jitanda, ne kwamba mba, Amena; Aleluya.

Kabiji jiwi jaishile kufuma mu jitanda, amba, Atotwe Lesa wetu, bonse bakalume banji, kabiji ne anweba mu mwakamwa, bacheche ne bakatampe.

Kabiji Naumvwine nobe jiwi ja jibumba jikatampe, kabiji nobe jiwi ja meema avula, kabiji nobe jiwi ja kutatauka kukatampe, kwamba mba, Aleluya: mambo aye Yehoba Lesa wabulume bonse uji mu bufumu.

Twayai tusangalale ne kusekela, tumutumbijike aye: mambo masongola a mwanamukoko afika, ne mukazhi wanji winengezha kala.

⁵² Natemwa kwamba bufuku buno pa mutwe wa: *Masongola A Mwanamukoko*, pa maminetitu acheche ku . . . Twibakaya bingi na kiky Kinembelo. Kwakubula ne luzhinauko kafunga wenu kuno wapitapo bimye byavula pa yuwe mutwe.

⁵³ Kabiji, mba, twayuka mba kukekala Musongwa, kabiji kukekala kijilo kya masongola kikapewa mulwelele. Abyo kine ibyo byokikekala, byonka byo aji Lesa, mambo ke Kyambo Kyanji. Kabiji twayuka mba aba bakekala Musongwa bakekala Kipwilo Kyanji, kabiji bakamweka ku meso Anji kwakubula jitomya nangwa jifunye. Kabiji baji na bingijisho panopantanda pa kyonka kino kimye bya kwinengezhako. Inge mwamona, Kyaambiwa mba, "Aye mwine winengezha kala."

⁵⁴ Bavula baamba mba, "Inge Nkambo wakonsha kufumya yuwe mupashi watama mwi amiwa, kufuma ku kutoma, nangwa kufuma ku ngyuka, nangwa kufuma ku bubela, nangwa kwiba, Amiwa nkamwingijila Aye."

⁵⁵ Bino akyo kijitu kwi obewa. Monai, obewa wafwainwa kubapo kintu kimo, ne apo. "Abo bashinda bakaswana bintu byonse." Aba bashinda. Anweba muji na bulume bwa kwikyuba,

bino mwafwainwa kuswa kwibutula panshi. Mwamona? “Aye winengezha kala Ayemwine.” Natemwa kyokyo Kyambo.

⁵⁶ Mwamona, Lesa kechi wakonsha kwitushijika kupita mu mupaipi mucheche, ne kwitulupwila kulubaji lukwabo ne, kabiji ne kwamba mba, “Batokwa aba bashinda.” Obewa kechi wajingapo na kimo kya kushinda ne; Aye wakushijikiletu kukupisha monka. Bino obewa wafwainwa kufukula obewa mwine. Nafwainwa kwifukwila amiwa mwine. Mu kuuba kyokyo, tumweshwa lwitabilo lwetu ne mushingi kwi Lesa.

⁵⁷ Abulahama walailwe mwaana, bino aye walamine yuwe mulaye pa myaka tweti-faivi, bya-kupita-pitamo byo ajinga nabyo, ne byalweseko, mu yoya myaka tweti-faivi. Bino aye wakwachijiletu ku kyambo kya mulaye.

⁵⁸ Kabiji Isalela walailwe ntanda ya mulaye, bino nangwa byonkabyo balwijilenga ntampulo iji yonse. “Pose pakanyata ngayo ya mauulu obe, apa po Nakupa,” byo byaambile Lesa kwi Yoshiwa. Byonse byajinga konka. Ntanda yajinga konka, kabiji Lesa wi ipaine kwi abo, bino patanshi bafwainwa kwiyilwila.

⁵⁹ Jishindatu jimo byo kiji pa lubuko lwa Bulesa. Lesa uji na bulume bwa kwimubuka, inge muji na lutundaiko lwa kwikitambula, bino mukalwisha tampulo ya lwendo lonse.

⁶⁰ Lesa uji na lusa lukatampe lwa kukupulusha, kabiji Aye wakonsha kwikyuba, bino obewa wafwainwa kulwa lwendo lobe lonse.

⁶¹ Naikala kunyuma ya pulupiti, kasa mbena kuya pa myaka sate-wanu, kabiji kila ichi yense walwendo paji bulwi, kikaputu. Kine byokiji.

⁶² “Bino twafwainwa kulwa inge twafwainwa kwikala mu bufumu.” Nanchi twatana kuuba mba Musongwa wafwainwa kwingezha Aye mwine. “Kwikala wakasuluka kutulapo kinemenezhi kya bubi bupelawizha kwitusendula, pakuuba mba tunyeme na butekanye kikokwany kyabikwa kulutwe yetu.” Twafwainwa kwibutula ku lubaji lungi, atweba bene. Atweba kechi twakonsha kwamba mba, “Lesa, Anweba iyai, witubikilebo kulubaji.” Twafwainwa kuuba kyokyo, atweba bene.

⁶³ Pano, Natemwa kulanguluka pa masongola. Naikala na jishuko ja kusongweshwa bantu bacheche. Kabiji Nalanguluka mba, inge Natwala mwanamulume mwanjike ne mwanamukazhi mwanjike ku kitapisho, kabiji ne kwibamona baiya kupichila mu kipwilo; kabiji aye, walamba pa kumwala bivwalo bya masongola, ne kibuto kyabikwa pa meso anji kasa kipeepela; kabiji ne musongwa, wawaina, wawwala bulongo; kabiji mwanjike ne kuyulwa na bulume, byo benda momwa mu bumi bwabo bwakila kuwama, kabiji ne kuchipa luchipo lwa masongola, Nalanguluka mba pajipo kintu kimo kyawama pa kikyee. Pajipo kintu kimo kyazhila, mambo akyo kimvulula

mba kukekala juba jikwabo jikatampe ja masongola, kimye Musongwa wa Kilishitu ukekila kufuma mu makonde a Lukumo.

⁶⁴ Aye Musongoshi ukekala winengezha mu bintu byonse. Kukekala masongola ne kijilo. Byotwafwainwa kutemwa kulanguluka kwikala na kutalang'ana mu bushiya bwa tebulu, kabiji ne kwiimuna maboko umo ne mukwabo, ne mipolo kasa ikukuluka pa mabuta etu. Kabiji langulukai, Aye ukeya, na kunshimuna mipolo yonse mu meso etu, ne kwamba mba, "Kujila ne. Pano kypawa. Twelai mulusekelo lwa Nkambo alo lwanengezhiwe anweba kufuma ku kintendekesho kya ino ntanda." Oo, mulongo, akyo kiketulengela kwitemwa kukijishapo atweba bene na bene.

⁶⁵ Naketekela mba alo lolukatazho luji na Kipwilo, Musongwa leelo, awo walengwa na bipwilo byonse byaketekela mwi Kilishitu. Kechi kyashimikwa kya kipwilo ne, kabiji kechi kabungwe nangwatu dinominesheni ne, pakuuba ke muntu bunke bwanji mu kyokya kipwilo ye ulenga Musongwa.

⁶⁶ Amiwa njina mulunda wawama mu Louisville, Kentucky, Dr. Wallace Cauble, awo wajinga wa mwingilo ku Kipwilo kya Kilishitu, kabiji waishile na kutambula Mupashi Wazhila, kabiji ufunga kimo kikatampe, bipwilo byabaisha biji mu Louisville, kipwilo kya Kibelo Kyakyashi. Aye waikala ke mulunda wawama bingi kwi amiwa. Kabiji moba acheche apitapo, Naimene pa mukwakwa, kabiji Namumwene byo aishilenga mu mukwakwa. Kabiji kimye kyonse Namutemenwe, kabiji naye watemwenwe.

⁶⁷ Bino juba jimo bamuntumbwile pa kikolomeno, kabiji mashi avula afuminenga kukeba ne kufwa. Kabiji bajinga nanji kokwa ku Kipatela kya Yosefwa Wazhila, kabiji baambile mba ubena kufwa. Kabiji Mrs. McSpadden bangichile, ne kwamba mba, "Dr. Wallace Cauble." Amiwa kechi na kimuyukile ne, bino Nayukile mba kuji kipwilo kikatampe kya Kibelo Kyakyashi. Waambile mba, "Ubena kufwa. Badokotala ba mupa manguya, ne byonse byafwainwa. Bamutungu mukachi. Aye watwajijilatu na kufumya mashi, kabiji abo bakakalwa kulekesha mashi. Mashi anji kechi akonsha kuchimba ne, kabiji, mwayukatu, kuleka kufumya mashi." Kabiji waambile mba, "Baji na bamishonale momwa, kabiji babena ku nkukeba obewa wiye, umulombelele."

⁶⁸ Kyawama, namumvwinapo Dr. Wallace Cauble, kabiji Naubileko kifwe pacheche, nangwa byonkabyo Naile konka. Kabiji byo Namwene mu kibamba kya mu kipatela, mwajinga bamishonale ne bamwingilo bakatampe, bonse bajinga monka, na kujila ne kulomba. Kabiji Nalangulukile mba, "Oo, ami! Ami mucheche, mucheche uba kyongo-kyazhila, ntwele momwa? Kyangwamina kwikalatu pano pangye." Nanchi Naiile kunyuma ya mashinyi wa Konko mu kibamba kikatampe. Nalombele

kwi Lesa, mu—mu kulekesha mashi, akwa Mulongo Cauble. Nabwelele kunyuma kabiji nalupukile.

⁶⁹ Amiwa nafikiletu ku muzhi, pepi nobe mamineti fiftiini, kabiji foni wajijile jibiji, kabaji bakebelenga kuyuka kyalengela kubanda kika, kyakuuba mba Amiwa kechi nafika kokwa ne. Kabiji Naambile mba, “Na—Najikwiya. Bino kwajinga bavula bingi mukachi. Ami—Amiwa kechi natundayikilwe kutwela mukachi ne, kapepo, monai, bavula bingi, bamwingilo bakatampe bajinga momwa mukachi.”

⁷⁰ Pano aye waambile mba, “Iya ponka pano.” Waambile mba, “Awe muntu kechi wakonsha kwikala na bumi kimye kyabaya ne.”

⁷¹ Nanchi Nabwelele jibiji, ne jikwabo. Kabiji byo Natwelele momwa, aye waesekelenga kwalula nyenga wa ku Katolika amba amutambule Kilishitu kwikala Mupulushi wanji; kabiji aye wasuminenga mashi, ne mashi alupukilenga kufuma mu kanwa kanji. Amiwa natwelele mukachi.

Kabiji aye waambile mba, “Muji byepi?”

⁷² Kabiji Naambile mba, “Muji byepi?” Aye waikela pa mwanya, kabiji ne kukopola byobya, ne mashi kasa alupuka.

Kabiji aye waambile mba, “Jizhina jobe yobe ng’anyi?”

Kabiji Naambile mba, “Amiwa ne Mulongo Branham.”

⁷³ Kabiji watatwile kujila, wabikile maboko anji pe amiwa. Nafukamine panshi ponkapa.

⁷⁴ Pano, ke Dr. Wallace Cauble, wa ku kipwilo kya Kibelo Kyakyashi mu Louisville. Mwafwainwa kumutambwila kalata. “Aa mashi alekele mu yekawa sekondi.” Kechi akyendapo ne, kufuma mu kyokya kimye. Mwamona? Kabiji twaikala bingi, balunda bawama kufumatu pakyokya kimye. Kabiji juba jikwabo, Namukumenye. Kabiji waambile mba . . .

⁷⁵ Oswald J. Smith, anweba bavula mwayuka Mulongo Smith. Aye ke mishonale mukatampe, kabiji wiiya kwi Mulongo Cauble, mambo wamutemwa bingi. Aye waambile mba, “Mulongo Cauble, wayukatu,” aye waambile mba, “Amiwa . . .” Kintu kimo pa mukazhi wanji. Aye waambile mba, “Kimye kitanshi kyo Nasongwele,” waambile mba, “Naumvwine nobe, kyawama, inge Nauba kilubo, Amiwa nkooba, oo, Nakonsha kutola mukwabo,” mambo wajinga mwanyike. “Bino,” waambile mba, “panyuma ya kuvula baana,” waambile mba, “nanchi kikala kyakosa kwakubula aye. Apo po ufika pepi nobe myaka fifite, kechi wakonsha kwikala kwabula aye ne. Kabiji byo uya nakukoma, kika, obewa—obewa wikyumvwa mu yewo musango.”

Naambile mba, “Naketekela mba akyo kiji bulongo.” Najinga . . .

⁷⁶ Mwisambo wayishilepo, mwayuka bainetu byo bapota bintu, kabiji bakazhi bami bajingapo. Kabiji aye ke mfumu wa mukazhi wa byonse. Wikalatu kimye kyonse. Maulu ami aatama pepitu kungipaya, kwenda pa mukwakwa na kuzhokoloka nanji. Kabiji aye wambujile, mba, “Kyawama, obewa kuuba wikyuba kwakubula aye ne.” Kabiji aayo ng’ambilo byo yaishile.

⁷⁷ Byo Naile kunzubo, Naikele mu kibamba kokwa, na kulanguluka, “Abyo ibyo.” Nekisokakenye ku kintu kikwabo.

⁷⁸ Mwayukatu, kimye kitanshi kyo Naalwilwe mu . . . kwikala musapwishi waki Missionary Baptist, Nalangulukile mba, “Inge muntu kechi wajinga Baptist ne, nishi aye kechi wapuluka ne. Abyo byokyajinga.” Kabiji Natolele Baibolo mu kwapa kwami, kabiji Nalangulukile mba Nkambo wangichile kwalula bantu bonse bekale ba Baptist. “Kabiji muntu yense kechi waketekejile nobe byonka bya ketekejile ba Baptist ne, kechi bajinga mu kipikichala nangwa pachechetu ne.”

⁷⁹ Nobe moba byo apichilepo, Nalangulukile mba Najinga na mwingilo yense wakwingila, amiwa mwine. Kabiji Naishile kutana mba, Namwene mulongo mukwabo wajinga na kipwilo, kafunga. Naye wandoselenga, na bulume bonse monka mo Naubijilenga. Pakupitapo kimye, mwemba wandoselwe pacheche kuya ku lubaji lwanji ne aye, mwayukatu.

⁸⁰ Nanchi twatana kuuba mba, tubena kwikeba umu ne mukwabo. Kabiji pano, panyuma yakutatula kufika pano, kikalatu kyakosa kyakuuba mba kechi wakonsha kwingila kwakubula mukwenu ne. Byo byonka. Twafwainwa kwikalatu umu na mukwabo, kuuba kyokyo. Kabiji Naketekela kyokyo mu ino ng’endo ya kipentekosita. Nasekela pakumona aya mipaka ya lwabano yatatula kupwa, Kipwilo kikatampe kya kwa Lesa kyatatulwa kukwatakana pamo mu lumvwang’ano lwa bupompweshi. Akyo kyalumbulula mba masongola abena kwiyatu pepi pepi. Kabiji mabwe, achibaulwa mwapusanako byonka byo afwainwa kwikala, baji na mpuzha kuntu kumo mu kishimikwa, inge o mabwe a Nkambo.

⁸¹ Pano, masongola, mu mulanguluko umu, ke kipasha. Masongola a pano panshi ke kipasha kya masongola a mwiulu. Pano twayai tuye mukikye, mu bimye bichechetu, na kupitulukamo mu kakimye kacheche.

⁸² Kintu kitanshi kyafwainwa kwikalako, kwafwainwa kwikala kufukula byakuuba. Kintu kitanshi, kisenda, mwayila masongola a ku mubiji, mulanguluko wafwainwa kufukulwa. Inetu mwanyike wafwainwa kufukula byakuuba, kana ubena kukeba yuwe nsongwalume; kabiji mwanamulume mwanyike, kana aye ubena kukeba yuwe mwanamukazhi wakyanyike. Pafwainwa kwikala mulanguluko walengwa, ne obewa wafwainwa kumufukula. Aye wafwainwa kwikalatu mwanamukazhi umu muntanda ye watemwa, kabiji naye

wafwainwa kwikalatu mwanamulume umo. Inge kechi kiji byo byo ne, nishi obewa wafukula kyatama.

⁸³ Kabiji ajo jo jishindatu jimo byo kikala pakufukwila Kilishitu. Kintu kitanshi kyo wafwainwa kuuba, ke kufukula mu milanguluko yobe kana usa kwingijila Lesa ne kumutola Aye kwikala Mupulushi obe, nangwa kechi ukeyyuba ne. Obewa usa kwingijila ntanda nyi? Obewa usa kwingijila Kilishitu nyi? Obewa wafwainwa kulangulukapo. Pafwainwa kwikala mfukwiilo ya bikwapo. Inge wafukula mu milanguluko yobe, amba obewa usakwingijila Lesa nangwa bunoshi, apa bino wafukula obewa mwine. Bino mulanguluko wafwainwa kwikajikwa.

⁸⁴ Kabiji pano, panyuma ya kwikajika mulanguluko, amba obewa, popekala kukobekela. Akyo, mwikitana kyo ku kitapisho. Obewa wafwainwa kukobekela akwe kusambakana kasa kukyanye kwikalako. Kabiji abyo byokiji na Kipwilo kya Kilishitu. Obewa wafwainwa kukobekelwa kwi Kilishitu, lu—luchipo, kukobekelwa, kukwatakana kwa butemwe.

⁸⁵ Kabiji pano, kintu kikwabo kyalondelapo, ke—ke milaye ilengwe. Kwafwainwa kwikala milaye yalengwa umo ku mukwabo, mu yewo musango walaya mulaye. “Mutemwe, inge wasongola, Amiwa nalaya mba Amiwa kekala walukokelo ne wakishika. Amiwa kechi katalapo pa mwanamukazhi mukwabo ne.” Nangwa, “Amiwa kechi katalapo pa mwanamulume mukwabo ne. Kabiji Amiwa nkoba byonse biji mu mwingilo, nobe mukazhi. Kwikala na baana, nkoba mwingilo uji yense nobe—nobe maama. Ami—Amiwa nkekala kalama wa nzubo.” Yonse ye milaye yafwainwa kulaiwa, nangwa yafwainwa kulengwa, mu masongola aitabilwa.

⁸⁶ Kabiji akyo kyo kintu kimo inge mwaiya kwi Kilishitu. “Nkambo, inge Anweba mwakonsha nkutambula mu Bufumu Bwenu, Nalaya.” Byo byo kiji. “Amiwa nemutemwa Anweba. Amiwa kekala wakishika kwi Anweba. Amiwa ke mwingijila Anweba, mute ne bufuku.” Kyatama bingi byo tulubako kyokyo. “Amiwa ke mwingijila Anweba, mute ne bufuku. Amiwa kekala kwakubula kuja. Amiwa kalomba. Amiwa kekala walukokelo kwi Anweba. Amiwa kaleta bya bujikumi byami mu butala. Ami—Amiwa nkoba—Amiwa kalomba, bimye byavula pa juba. Amiwa nkoba—Amiwa nkoba bintu byonse. Kabiji Nalaya kupana butemwe bwami bonse kwi Anweba.” Abyo byo wafwainwa kuuba. Abyo kine ibyo, apo po mulaya byo byo, kabiji kyafwainwa kufuma mu muchima obe.

⁸⁷ Inge walaya mulume obe byo byo, bino kyaikala kyabula kufuma mu muchima obe, washininwa nakyo, obewa nishi kechi ubena kwikala nanji mwafwainwa ne. Kiji pamo nobe kyubilo kyakwatakana pamo.

⁸⁸ Talai kuno. Inge—inge kechi muji na meno ne, kabiji wingijisha meno abubela, bino, akyo kijitu bulongo. Ke kupingakenya mu meno ao owajinga nao kimye kimo. Bino, kine kintu, aa meno kechi anungakana ne obewa ne. Kechi lubaji lobe ne. Inge wajinga na—na kuboko kwachibikako, kabiji wabikako kuboko kwa bubela, kyawama, akwa kuboko kine kechi kwanungakana pamo ne obewa ne. Kwasomekwatu kwi obewa. Mwamona? Kechi kyanungakana ne obewa ne.

⁸⁹ Kabiji umvwe twachipa luchipo lwetu kwi Kilishitu, inge twabula kwikala lubaji Lwanji, nobe mwanamukazhi byo afwainwa kwikala lubaji lwa mwanamulume ne mwanamulume lubaji lwa mwanamukazhi, nanchi atweba twi Benakilishitu balengwatu. Atweba kine kechi . . . Obewa kechi wasongola yewa mwanamukazhi ne, obewa wafwainwa kwikala walukokelo, inge wabula kutemwa balume boobe, kabiji nsaaji na myaka sikisite nangwa sebeta, kabiji wabula ku mutemwa byonka byo wa mutemenwe pakuntendeka, nanchi obewa ubena ku mukomesheshatu baana banji.

⁹⁰ Aboyo bipwilo byo biji, byavulatu buleelo. Tubena kutolatu jizhina ja “Kipwilo kya Bwinakilishitu,” kasa twifwanyikizha kwikala Musongwa. Bino, kasa kijitu kya kumubiji. Atweba kechi twanungakana ne Kilishitu mu jishinda jiji jonse ne. Atweba tujitu pamo nobe jino jakulengwa, kuboko kwakulengwa, jiso jakulengwa. Mwamona? Ke kintu kyalengwa inge tubena kwikisokekakotu. Kyawama, kechi wakonsha kusokekako Bwinakilishitu ne. Obewa wafwainwa kunungakana naji.

⁹¹ Kabiji nanchi kipwilo kyalengwatu, kyatelwa mba kipwilo kya Kilishitu, kyawama, aba baana nanchi kechi baji Momwa ne, aba basemwa ku kabungwetu kamo. Ujitu . . . Abo kechi ke baana bakwa Kilishitu ne. Abo ke baana ba ki dinominesheni, kabiji kechi baana ba Kilishitu ne.

⁹² Inge mwanamukazhi kechi wanungakana na mwanamulume mu bukishika ne, nanchi kechi ke mulume wanyi ne. Ke mwanamulume ye achipa naji luchipo lwa kwikala nanji, kabiji wachipile luchipo lwatama. Wachipile kumutemwa, kabiji waambile mba wamutemenwe, kabiji kechi wikyubile ne. Kimye kyonse, mwanamulume wajimbaikwa.

⁹³ Bino kuji kintu kimo kyakine, balunda, atweba kechi tukajimbaika Kilishitu ne. Aye wayuka Bakwanji mwine.

⁹⁴ Bino, mwamona, patanshi, kufukulwa kulengwa. Kyalondelapo, kukobekelwa. Apa bino, ke kulaya.

⁹⁵ Kabiji, apa, ke kusekelela. Kabiji apa ipo musongwa—musongwa po asenda jizhina ja musongoshi. Aye pano kechi uji palwanji na jizhina janji ne. Aye usenda jizhina ja musongoshi.

⁹⁶ Kabiji umvwe Kipwilo kyaikala na kusekelela, balaya milaye yabo, apo popo Asenda Jizhina ja Musongoshi. Nanchi

Aye kechi ukijipo kipwilo kya ntanda ne. Aye ke Kipwilo kya Nkambo Yesu Kilishitu. Amena. Kechi. . . Amiwa kechi natazha mu kyokyo ne, kuuba mba, kupichila mu jizhina ne. Natazha mukuuba, mba, mu Kusemwa, kupichila mu kiseumwa, mu bulume bwa Lesa. Kupichila mu Bukine bwa kwa Lesa kwasololwa, mu muchima, Akyo kikala Kipwilo kya Bwinakilishitu, Kipwilo kikatampe kyantanda yonse kya Bwinakilishitu. Akyo kikala lubaji lwa Kilishitu. Umvwe Aye wauba kyokyo, Aye. . . Kilishitu watwezhamo mwi Aye Mupashi Wanji Mwine, Bumi Bwanji mwine. Kabiji Baibolo waamba mba, kwi Adama ne Eva, kokwa, “Anweba kechi muji babiji ne, pano ke umo.” Kabiji umvwe mwanamukazhi, Kipwilo, kyasongolwa kwi Kilishitu, kechi bakiji babiji ne. Abo ke Umo. Kilishitu mwi obewa! Amena. Byokiji. Bumi Bwanji bwaletwa mwi obewa, pano waikala ke Musongwa.

⁹⁷ Nanchi, kintu kikwabo, panyuma ya kuchipa lonselwe luchipo, ne bikwabotu, kabiji ne kusekelela kwaambiwa kala:

⁹⁸ Nobe, jizhina ja mukazhi wami wajinga Broy kasa akyangye kusongolwa. Pano, aye kechi ukiji Broy ne. Aye ke Branham. Pano, kechi ukiji Broy ne. Aye ke Branham.

⁹⁹ Kabiji umvwe mwaiya mwi Kilishitu, kechi mukijipo ba muntanda ne. Anweba mwi ba kwa Kilishitu. Mwamona? Obewa kechi watako muchima ku bintu bya muntanda ne. Abo byafwa kwi obewa. “Mambo aye watemwa ntanda, nangwa bintu bya muntanda, butemwe bwa Lesa kechi buji mwi aye ne.”

¹⁰⁰ Nanchi, mwamona, kechi wakonsha kwikala Mwinakilishitu wakulengwa ne. Obewa wakonsha kwikala wa kulenga, watela mba Mwinakilishitu.

¹⁰¹ Bino kuuba waikala Mwinakilishitu ne, waikala, posotu Kilishitu witwezha Ayemwine, monka mu lubatizhilo lwa Mupashi Wazhila, mwi obewa. Apa bino wanungakana Nanji. Anweba pano kechi muji babiji ne. Anweba mwi Umo. Kilishitu walaile kwikala mwi atweba, nobe Bashanji byo bajinga mwi Kilishitu. “Amiwa ne Ba Taata twi Umo. Anweba ne Amiwa twi Umo.” Mwamona? Kilishitu mwi atweba! Byonse Lesa byo ajinga, Aye waitulwijile mwi Kilishitu. Kabiji byonse Kilishitu byo ajinga, Aye waitulwijile mu Kipwilo, na kutwajijila mwingilo wa Mamboawama.

¹⁰² Nanchi twikala, kechi ku jizhina ja kulenga ne, kana ku bukine bwa Mupashi Wazhila bwa Bumi bwitunungakanya mwi Kilishitu. Nanchi, kupichila mu bulume bwa lusanguko Lwanji, twasangulwa kufuma ku bintu byafwa bya muntanda, ne kwikala Nanji mu bifulo bya Mwiulu. Amena. Natemwa kyokyo. Bufuku buno, atweba twaikala mu bifulo bya Mwiulu mwi Kilishitu Yesu, mwamona, basanguka Nanji; bafwa ku bintu bya ku ntanda, ne kumwala Kilishitu. Kabiji umvwe twamwala Kilishitu, pano ntanda yafwa, nanchi kechi tuntako

muchima ku ntanda ne. Ntanda yafwa kwi atweba. Kabiji atweba. . . Kabiji yafwa kwi atweba, kabiji atweba twafwa kwi ayo.

¹⁰³ Obewa wi muntu wapusanako, bumuntu bwa pusanapusana, mambo obewa wi kilengwa kipya. Kilengwa! Kechi kyonka kilengwa kimo ne, kya wamishiwatu; kechi ke—ke muntu waaluka ke jibula jakatataka ne. Pakuuba muntu wafwile, kabiji wasemwa jibiji, kabiji waikala ke kilengwa kipya mwi Kilishitu Yesu, kabiji Mupashi wa Lesa mumi uji mu muntu.

¹⁰⁴ Pano, kijitu pamo nobe mwanamukazhi wabula kutwajijila kwikala Broy, aye ke Branham, kabiji uya na joja jizhina.

¹⁰⁵ Kabiji Kipwilo kechi kikiji kya muntanda ne, pakuuba kiji mu Jizhina ja Kilishitu, Akyo byo kiji. Aye wanungakana Nanji, konka ku Bumi Bwanji Ayemwine.

¹⁰⁶ Bushe mwatangapo mu Kinembelo, awa muntu mutanshi, Lesa ye alengele, wajinga ke—ke muntu pabiji? Adama wajinga byonse bibiji Adama ne Eva, kwamba mwaila bumupashi, pakuuba byo Alengele muntu mutanshi mu kipasha Kyanji mwine. “Kabiji Lesa ye Mupashi.” Bino, byo Ebabikile mu mubiji, Aye wibabenye. Aye watolele mupashi wa bwanabulume, ne kumubika mu mwanamulume, ne kutola mupashi wa bwanabukazhi ne kumubika mu mwanamukazhi.

¹⁰⁷ Pano, inge mwamona mwanamukazhi ubena kukeba kuuba byubilo nobe mwanamulume, pajipo kintu kimo kyatama. Inge mwamona mwanamulume ubena kukeba kuuba byubilo nobe mwanamukazhi, pajipo kintu kimo kyatama. Nanchi kyo kimwekela nobe ntanda yonse yalubakana, buleelo. Banabalume babena kukeba kuuba byubilo nobe banabakazhi; banabakazhi nobe banabalume. Abyo ibyo. Kyakine.

¹⁰⁸ Pano talai. Ke kyalumbuluka bingi, kyakuuba mba Lesa byo atolele ne kulenga muntu, kabiji pa kumwesha mba Aye kechi wakebelenga mba kikale kintu kyapusanako ne, mwanamukazhi kechi wajinga mu bilengwa bitanshi kulengwa ne. Nanchi aye kechi uji mu bilengwa ne, bino aye ke lubaji lwa kwa Adama. Aye walengwa-kufuma mu kintu kimo. Aye uya ku lubaji lwa kwa Adama, kechi kulenga kilengwa kikwabo ne, pakuuba kutola lubaji lwa kilengwa ne kulengamo kilengwa kikwabo mwi akyo. Kabiji Aye watolele mupashi wa bwanabulume wajinga mwi Adama. . . Kabiji watolele mupashi wa bwanabukazhi ao wajinga mwi Adama, byonkabyo, ne kumubika mu mwanamukazhi. Nanchi, byonse bibiji mupashi ne mubiji, byaikala ke umo.

¹⁰⁹ Kyajinga kipasha kyawama bingi byaubile Lesa pa Kalvali. Aye watolele Kilishitu, ne kumunungakanya Aye ku Kipwilo, ku lubaji lwa mbavu, Aye walupwile Mashi atokeshe muntu, akya kyatokeshe mubiji wa Kipwilo, ne kubikamo Mupashi wa Lesa mumi, awa Ye afumishe pa musalabu, kufuma kwi Kilishitu, ne

ku Mubika mu muntu umo. Nanchi abo ke umotu. Baikele ke umo. Kilishitu ne obewa mwi umo.

¹¹⁰ Kabiji obewa ne balume bobo mwafwainwa kwikalatu umo. Inge pajipo kintu kimo kyapusanako, nishi pajipo kintu kimo kyatama na konkwa kunungakana kwenu.

¹¹¹ Kabiji umvwe pajipo kintu kimo kyapusanako mwi atweba, kwi Kilishitu, atweba kechi twaketekela Kyambo Kyanji ne, amba, “Oo, akyo kyajinga kya moba akwabo,” apo pajipo kintu kimo kyatama mu kunungakana Nanji. Inge waamba mba, “Moba abya kukumya apita; kechi kujipo lubuko lwa Bulesa ne; kechi kujipo lubatizhilo lwa Mupashi Wazhila ne,” bwezhai kyokyo kunyuma pantu pamo, akyo kimwesa mba Mupashi wa Kilishitu kechi uji mwi obewa ne.

¹¹² Mambo, “Muntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa. Kabiji Kyambo kya alwilwe ke muntu.” Kabiji umvwe Kyambo Kyanji kyaikala mwi obewa, nanchi, mwamona, obewa ne Kilishitu mwi umo. “Inge mwaikala mwi Amiwa, kabiji Kyambo Kyami mwi anweba, mwakonsha kwipuzha kyo musaka,” mambo kechi mukiji anweba bene ne. Ke Kyambo kya Lesa, Kilishitu mwi obewa. Obewa waikala ke umo. Kijitu bulongo.

¹¹³ Kabiji, kintu kikwabo, panyuma yakuuba kyokyo, panyuma ya kufikizha luchipo lwanji, ne kusenda masongola anji, ne kusenda jizhina-ja-mulume wanji, jizhina ja musongoshi, aye wikala ke nswanyi wa bintu byonse bya bunoshi bwanji. Aye ye nswanyi wa pa bintu byonse. Mukazhi wenu ke nswanyi wa pa byonse bya bunoshi byobe.

¹¹⁴ Kabiji abyo Kipwilo byo kiji, inge Akyo kyayukile byobyoy, byokiji ke lubaji Lwanji na Mupashi Wanji uji mwi Akyo. Aye waambile mba, “Mingilo yo Nguba ne anweba mukeyuba. Ne yakila pa iye mu keyuba, mambo Amiwa ngya ku Ba Taata. Pa kakimye kacheche, ne bapanopantanda kechi ba Nkamona ne; pakuuba anweba mukamonanga Amiwa, mambo Amiwa kekalanga ne anweba, ne mwi anweba, kufika ne ku mpelo ya ntanda.” Nanchi ke Kilishitu mwi obewa. Anweba mwanungakana pamo, kabiji anweba mwi banswana pamo Nanji.

¹¹⁵ Kabiji inge Aye wajinga pano pantanda, inge Aye waubilenga ka? Kintutu kimo kyo Aubile kookwa, mambo Aye ujitu pamo keesha, leelo, ne myaka yonse. Aye wafwainwa kuta muchima ku mingilo ya Bashanji. Aye wafwainwa kubuka bakolwa. Aye wafwainwa kuba byakukumya. Aye wakonsha kwibyuba byonka byo Aubilenga kimye kyo Ajinga pano pantanda, mambo Aye waikalatu musango umo keesha, leelo, ne myaka yonse. Ke kyalumbulukatu. Ao o masongola.

¹¹⁶ Pano, bino, byepi umvwe awe mwanamukazhi wasongolwa, wasenda lonse lwe luchipo ne bintutu byonse, kabiji waikala

mulume ku yuwe mwanamulume, kabiji waikala nswanyi kubyonse byo ajinabyo, ne bintutu bikwabo, kabiji wabwela waya mungitu? Aye watatula bukyendeende. Aye watatulako, kuya na banabalume bakwabo. Kechi kyonka kyotu ne, kabiji ubena kushilang'ana butemwe bwanji na bantu bakwabo. Mwanamulume na mukazhi wanji, milaye yonse yo balaile, wabwela waya kungi na kushilang'ena bumi bwanji na bakwabo, butemwe bwanji ne kufwalama bantu bakwabo.

¹¹⁷ Abyo bavula batelwa-mba Benakilishitu byo booba, kushilang'ena butemwe bwenu na ntanda: kukaya, kuzha, kuteya ngyuka, kwikala pa nzubo ne kuya ku milombelo ne, na kutamba televizhonyi, misango yonse ya bintu bya muntanda abyo byasenda mpuzha ya butemwe bwa Lesa, mu muchinda wa kipwilo. Aye waya mu bukyendeende. Aye wayatu mungi. Aye walondela banabalume bakwabo. Aye ubena kushilang'ena butemwe bwanji. Aye ukatola bya bujikumi byanji byo akonsha kupana ku kipwilo; aye ukataya ku bintu bikwabo bya muntanda. Aye wakonsha...Mukifulo kya kutemwa Lesa mujishinda jo akonsha kwikyubilamo, kabiji ne kwikela bumi bwa Lesa, ne butemwe bwakwiya ku kipwilo, mwafwainwa ku mukajikizha pakuuba mba eye.

¹¹⁸ Kika, Nayuka, kuno kechi papita kimye kyabaya ne, wa—wa mwingilo wambuujiile mba watumine milombelo yavula... bitumpa byavula, pakuuba mba bantu bafwachike, amba bafwainwa kuchipa kwiya ku Sukuulu wa Pamulungu nangwatu bang'ondo sikisi pa mwaka pa mwaka.

¹¹⁹ Kabiji Namwene nsongwakazhi mucheche konkwa munshi ya katumba, ako nko Naingijilenga. Kabiji aye wafumineko kokwa. Kabiji Naimene pa kibelo, na kukokosha ku kibelo, kabiji waishile ku kibelo. Kabiji aye wajinga bamo ba baabo baji na nkailo ya Nyama wa mungye, mwayukatu.

¹²⁰ Nobe jije jibumba jo bakwachile kuno ku Phoenix bufuku bwapita, Naketekela byo kyajinga, kasa booba akwe kulubakanya kwa—kwa mazha akuzhokoloka-na-kuzhokoloka, nangwa mba kuminyangala, monse mo kyatongwejiilwe, kabiji kyasendele bakapokola kwiya na kwibasenda. Balunda bakitwala, kechi mwayuka mba awa ke mupashi wakwa diabola nenyi? Baji mu bongozhi, poso abo bene kechi bayuka musango ye bajingamo ne, amwa mu mukwakwa, na kutwajijila.

¹²¹ Pamo nobe babinsela, nangwa bafyatula malekondi, ne basekesha bantu, ne bikwabotu, kuya mu mumpuzha, monka mu muzhi mo Najinga. Kabiji bainetu banyike na kuvula byakumvwala byabo bya mukachi na kutaya pa pulatifomu, pakuuba mba awe nsongwalume ebikope. Bushe kechi mwayuka mba awa ke diabola nenyi? Ke mupashi wa mu moba apelako. Kine. Ke kyabuvu bingi. Byobyo kiji, bayatu mungi.

¹²² Awe mwanamukazhi mwanyike, walupukile, ne kutwajijila. Aye kechi wayukile mba Najinga . . . Walubilemo mba naimana pa kibelo ne. Kabiji waambile mba, “Oo, ndekelaiko mambo. Nalubako mba anweba mwaimana popo.” Kabiji wafyompele awa mwanamulume wajinga pa waileshi, uji yense byo ajinga, ne kwamba mba, “Amiwa nsakukukumanya pa Greenbrier Patch,” nangwa musango yense mo kyaikela. Bajinga na mazha abwa bufuku.

Kabiji Naambile kwi Dr. Brown, ao wajinga mulunda naami.

¹²³ Aye waambile mba, “Kipwilo kyobe kyakwachijila byepi koko, Billy?”

Waambile mba, “Kyawama.” Naambile mba, “Tubena kupana mapilushi.”

Aye waambile mba, “Ng’anyi musango wa mapilushi?”

¹²⁴ Naambile mba, “Mamboawama. Ao kine ebalama kuuba mba kasa beeya bimye byonse.” Mwamona?

¹²⁵ Kabiji aye wambujile pa byobya, bya kufwachika lolwa luchipo. Kabiji Naambile mba, “Dr. Brown, bushe mwalanguluka mba awa nteenshi wa Kikayekaye pa waileshi bafwainwa kulengela yewa nsongwakazhi kufwachika luchipo lwa kutanwako bobwa bufuku? Nangwa pachechetu ne. Wafwainwa kupotesha byakumvwala byo aji nabyo, pakuuba mba afike kokwa.” Kika? Ke kintu kimo kiji mwi aye kyanungakana nanji, mupashi, ku bya kisangajimbwe biji mu ntanda.

¹²⁶ Kabiji poso Kipwilo kya Lesa mumi, akyo kitelwa mba Musongwa wa Kilishitu, kinungakanya byobya kwi Lesa, aye ukapitang’angatu mu ntanda, mu buchimba bwa bubi, poso wanungakana na Lesa mu jishinda ja kuuba mba, muchima wanji wayuzhiwa bingi na lukumo ne bulume bwakwa Lesa, poso kechi wakonsha kumona kikwabo ne kanatu Kilishitu. Abyo ibyo.

¹²⁷ Abyo ibyo twafwainwa kuuba. Alo loloka lunengezho, yo yonka ntachikilo Lesa yo aji nayo, ke kuuba kintu kiji byobyo. Obewa kechi wafwainwa kutwezhiwamo mu mubiji ne. Obewa wafwainwa kusemwamo, kechi ku kusukenyamo ne, nangwa kuleta kalata ku kipwilo ne. Bino kana kusemwa mu Kipwilo kya Lesa mumi, na bulume bwa kusangululwa, konka ku bulume bwa lusanguko bwa Yesu Kilishitu, akyo kikulengela kwikala kilengwa kipya mwi Aye. Amena. Akyo kine kyolola bintu. Akyo kyo kikyuba. Kine. Kijitu bulongo.

¹²⁸ Aye uyatu kiyeeyeye. Aye utatula kunshilang’ena butemwe bwanji na bakwabo, bintu bya muntanda, bisangajimbwe bya muntamda, kuya ku mampuzha ko akonsha kubula kuya, na kwamba bintu byo afwainwa kubula kwamba ne.

129 Kuno kimye kimo Na... Bajinga na bainetu... musango umo wa kijilo kya kipwilo kiji pakibamba kya peulu. Najinga na kintu kyakuuba pa kibamba kya panshi ya ino nzubo. Kabiji Nemubuula mba, Naumvwine bintu bimo byakila mukutama byo Najinga ndengamambo, bino, bino aya mbung'eno ya yewa mwanamukazhi, Amiwa kechi nakyumvwapo bisela byamusango yewa mu bumi bwami ne. Bushe mwafwainwa kufwanyikizha, muntu watelwa mba Mwinakilishitu, wakonsha kuswisha bintu byatama kufuma mwi abo nyi?

130 Anweba kuuba mwatola meema atobala ne awama kufuma mu mushima umo ne. Mwabika mbekete mu mushima, kabiji yalupukamo kasa yayula bilongolo-biminyangala, byo twibitela. Inge mwabwezhamo mbekete ne jikwabo, yalupula bintutu bimo. Mishima ikebewa kupilamo meema atama, ne kuyuzhamo na meema awama.

131 Alo lolukatazho luji na kipwilo leelo, kwambatu mwayila ntanda yonse, ne akyo kibena kukeba kupilamo meema atama, ne kuyuzhiwamo na meema azhila a Lesa afuma Mwiulu. Muchima wakyo waikala ke kizhiba kya bintun byonse biiya. Akyo kiji na batemwe ba misango yonse. Aye Baibolo waamba mba byokikekala. "Batemwa bya kisangajimbwe kukila byo batemwa Lesa, ba kubula kupwanang'ana, ba kubepela bakwabo, ba kubula kwilama, kabiji ba kubula kutemwa booba byawama."

132 Monai mwanamukazhi weseka kwikala bololoke, mwanamulume weseka kwikala bololoke, aye wikala ke "uba kyongo-kyazhila," aye wikala "wabisela," nangwa musango-umo wa kintu byakala. Akyo ke kya kutayatu. Kyalengululwa ne kukanwa ku bantu ba inontanda. Abyo ibyo.

133 Bushe mwakimonapo Kipwilo kyakine byo kyafwainwa kuuba nyi? Mu Lulayang'ano Lwakala, kimye kyo bajinga na—na kitapisho, baipaile kang'onzi kamo, ne kubika mashi akamo pa kakwabo, a kakwabo kafwa; kabiji katumbukile kukilang'anya ntanda, nakusapula mashi a kakwabo kafwa. Inge Kipwilo kyaikala Musongwa wakine wa Yesu Kilishitu, Akyo kikasenda Mashi akwa Yesu Kilishitu Nakyo, na kwi asansa pa mushiji, ne kwita mba, "Wazhila, wazhila, wazhila, kwi Nkambo." Ngubilo yakyo yonse, kyonse kiji mwi akyo kikekala kya Lesa. Kulengwa kwakyo konse kukekala kwa Lesa. Kechi mwakonsha kuketekelapo kintu kikwabo.

134 Oene mambo bantu kyo beshila ku kipwilo, ne abo. Kechi na kuteya ngyuka ne kukaya na byela, kuzhiila mu kibamba kya panshi ya nzubo, bijilo bya masuku ne bintutu biji byonkabya. Abya ke bya muntanda. Kabiji atweba kechi tuakesakana nabo pamo ne, kabiji bumvu bwikale ne atweba pa kwikyeseka. Twafwainwa kusapwila Mupashi Wazhila, mu bulume, ne lusanguko lwa Kilishitu. Tuji na kintu kimo kyo

babula kwikala nakyoy. Twayai twikale nakyoy, kechi kweseka nakwibakopela ne. Ikalai kyo twayuka mba kyaitabilwa. Ikali mwi kilishitu. Yesu waambile mba, “Inge Nashikulwa, Amiwa kabungizha bantu bonse kwi Amiwa. Anweba mwi mukele wa panopantanda. Pakuuba mukele wataya kutobala kwanji, kechi paji po awamina ne kana ke wakutayatu ne kunyataulwatu ku bantu.” Lushimo lwetu!

¹³⁵ Kechi kyakukumya ne, ne mabumba etu a ki Pentekosito, nangwa ne kinshikwa kwikyamba, mabumba etu a ki Pentekosito abena kuponena mu kintutu kimo, mu kyubilo kimotu. Kabiji kechi kyakukumya ne bantu bamba mba kechi baji nakyoy kyo bamba mba baji nakyoy ne. Akye Kipwilo kyang’endo ya pentekosito kyafwainwa kwikala kyakwatakana pamo na bulume bwa Lesa Wabulume bonse, poso bonka Bumi bwa Yesu Kilishitu bwamwekanyika mwi Akyo.

¹³⁶ Bino kukeba kupashang’anya na ba pano pantanda. “Atweba tusa kwi kyuba, nangwa byonkabyo.” Mwamona? “Tubena kukeba kwikala na jishinda jetu pa kikye.” Bino kechi twafwainwa kwikyuba ne. Kyatama kwi kyuba. Bipwilo bijitu pamo nobe mwanamukazhi, wayatu mu ntanda.

¹³⁷ Kintu kitanshi mwayukatu, wikalatu bulongo, kuntendekelo Lesa byo a semene kikye Kipwilo kya pentekosito, pepi nobe myaka foote nangwa fifite yapitapo. Kyaikele kyazhila. Kyajinga kyazhila. Bulume bwa Lesa bwajinga nankyo. Bino byo twailenga kulutwe, twatatula kulondela ntanda.

¹³⁸ Kintu kitanshi mwayukatu, twafwainwa kwikala na kinshimikwa kyabaya bingi kyakila kya ba Methodist kiji popa pa nkoona. Twafwainwa kwikala na kintu kyabaisha, kintu kyabaya bingi, kabiji kintu kyabaya bingi, kabiji kintu kyabaya bingi. Ke kyabuvu. Atweba bavula twikala belundumika inge twaikala na...Aye mulongo waki Pentekosito wamona muntu umo panshi, kamishonyi kacheche, nangwa kacheche ka kipwilo, kabiji baya ku kipwilo kikatampe. “Atweba tuji ku lubaji lwa kipwilo kitanshi, nangwa kipwilo kikatampe,” nangwa kintu kimo kiji byobya; ke kwibantajila panshi.

¹³⁹ Kyo mubena kukeba ke Mupashi Wazhila, pakuuba mba emufumyemo ngovu pacheche, abyo ibyo, lekai muyuke mba lubatizhilo lwa kine lwa Mupashi Wazhila lukalengela suti waipipa maboko wazhokolosha maboko aji ku ofoloshi ne kwamba mba, “mulongo.” Kiji bulongo. Ke musango-wakala wa lupulukilo, bulume bwa Lesa Wabulume bonse, ee, mwane, ukalengela ndeleshi yakala ya siluku yazhokolosha maboko ku kaliko, ne kwamba mba, “Nyenga, Amiwa nakutemwa.” Kine kikobiwa.

¹⁴⁰ Pakuuba twatatula kuya na ntanda, kuya na yewa musango. Kipwilo kyetu kiji nabyo. Atweba kechi twafwainwa kwamba pa ba Methodist ne ba Baptist ne jikwabo ne. Ke atweba bene.

Kiji mukachi ketu. Ao oene mambo Mupashi Wazhila kechi wakonsha kwenda ne. Ao oene mambo o Naambila mba Lesa kechi wakonsha kubika mizhilo Yanji pa kabungwe bufuku buno ne. Mambo, ba Ngetila kechi baitwa nobe kyaalo ne. Bajinga bantu kufuma mu Bangetila, na mambo a Jizhina Janji. Lesa ukafumyamo muntu umo umo.

¹⁴¹ Pano, Naketekela mba kabungwe ketu kengila mwingilo wawama. Akyo kijitu bulongo. Bino kechi mwakonsha kuketekela mu kyokyo ne, ambai mba, “Amiwa ne pentekosito, mambo Nalamata ku kabungwe ka Pentekosito.” Obewa wi pentekosito inge waikala na kyakupitamo kya pentekosito. Amiwa kechi nasakamana ne nangwa wikale wa ku kipwilo kya Katolika, obewa wi pentekosito. Obewa kuuba wa alula Pentekositi ke kabungwe ne. Pentekositi ke kyakupitamo, kechi kabungwe ne. Kabiji abyo ibyo.

¹⁴² Bino atweba bantu baki Pentekosito tutatula kulanguluka mba, mambo tuji na jizhina ja Pentekositi, twakonsha kutwajijilatu kuya kulutwe na kwikala muntanda, ne kuuba kintu kiji kyonse kyotwakeba kuuba. Tujitu pamo nobe kukajila kyamba kya kwa Nimulondi; kikekalatu ke buntotu. Kijitu pamo nobe empulo wakwa Adama wa jibula-ja mukuyu; aye ukabwela lunyuma. Kijitu pamo nobe kinshilwa kya Syegifuledi mu France, kinshilwa kya Maginoti mu Germany; byaonaikile.

¹⁴³ Mambo, kechi kujipo kyamba kikwabo ne, kafwako pakwabo pakwimana ne. “Pakuuba Jizhina ja Yehoba ke kyamba kyakonsa akyo baoloka kyo banyemenamo ne kwikala na mutende.” Inge mwanymena mwi Akyo, utola Jizhina, Jizhina; kechi kutelatu Jizhina ne, pakuuba Jizhina ne bumuntu bo uji nabo, bujitu pamo nobe bumi bwa-Kilishitu. Amena. Wakukumya byo Anji. Ee.

¹⁴⁴ Kipwilo kyaubatu kintu kimo, kyauba bulalalale bwa ku mupashi, nobe mwanamukazhi wakonsha kwabanya butemwe bwanji kufuma ku mulume wANJI ne kutwala ku mwanamulume mukwabo. Awa mwanamukazhi kechi wafikilamo kwikala nanji ne. Mwayuka kyokyo. Kabiji umvwe kipwilo kyatatula kwabanya lumvwang’ano lwakyo lwa bupopweshi na ntanda, Lesa ke Lesa wa mukao. Aye wamufumisheko Isalela mambo a byo byo, kabiji Mwaana Wanji ukafumyako kintutu kimo.

¹⁴⁵ Aye ukekala na Musongwa wabula mikonya mwi Aye. Amena. Aye waomvwewa na Mashi Anji aye mwine. Abyo ibyo. Nanchi twamona pepi po twaimana, kijilo kya masongola kyanengezhiwa kufika.

¹⁴⁶ Pano, twatana kuuba mba wauba bulalalale bwa kumupashi, ubena kwenda na ntanda, ubena kwamba kintu kingi, kasa ekala kintu kyapusanako. Akyo kechi kyakonsha kwingila ne. Kyafwainwa kuuba kipwilo, ke kuuba byaubile Eshita. Eshita wakaine mvwajilo ya muntanda.

147 Twayuka yewa buuku mucheche wa kwa Eshita, Mondekai byo aabile. . . Bamwisho yanji bajinga na mwaana wamukazhi. Kabiji kyajinga mu kimye kya bufumu bwa bena Mendo ne Pelisha. Ke kipikichala kyawama bingi popa. Aye mfumu, umo mukatampe mu mamfumu pantanda pose mujoja juba, wajinga na kijilo kikatampe. Kabiji waichile ina mfumu kwiya na kwikala ku lubaji lwanji, bino kechi wikyubile ne. Aye wakaine kwikyuba. Nanchi waubile byepi? Aye walengeshiwe bingi buvu, kechi wayukile mwakubila ne, kyakuuba mba mukazhanji mwine wakakalwa kwiya.

148 Nalanguluka mba kijitu pamo nobe Kilishitu leelo. Kilishitu witwita mba twikale mu bifulo bya Mwiulu pamo ne Aye, kabiji twi kyumvwina buvu. Bantu bavula baji na buvu bwa kwamba mba baji na lubatizhilo lwa Mupashi Wazhila. Bantu ba kipentekosito, abyoye, be kyumvwina pakuuba mba bekyambe. Atweba tumumvwina buvu Aye.

149 Kabiji nanchi mfumu kechi waishile ne. Aye waakaine kwiya. Kya mulengeshe buvu. Kilungi kyanji kyaalulukile ke kichila. Muntu yense wikimwene.

150 Nakumya kana kilungi kya kwa Yesu kechi kyaluka pacheche ke kichila ne, ne akyo, umvwe Aye witwita mba twingile mwingilo, wita ng'endo yaba Pentekosito kwiya ku lumvwang'ano lwa bupopweshi ne butemwe bwa balongo, kabiji twabikwa bu kabungwe mu mabumba poso kyakuuba mba kechi twakonsha kuswa kubila mukwabo ne. Tuji bingi, babena kutwela mu bya muntanda kabiji ne bintu bya musango yewa, tubena kumvwa buvu na jizhina ja Pentekositi. Bantu bamo baji na moyo wa kwikyamba. Kwaamba mba, "Kyawama, Na—Nalamata ku. . . Amiwa ne Mwinakilishitu, bino. . ." Amiwa nasekela Njina kyakupitamo kya pentekosito. Amena. Amiwa njibingi na lusekelo pa kusenda Jizhina ja Yesu Kilishitu. Ke jishuko jikatampe bingi jo Najinga najo, ja kwamba mba Amiwa ne wa kulubaji Lwanji.

151 Pano twatana kuuba mba, nanchi, aye wabikilemo basendwe, bakwipuzhako kyo akonsha kuuba. Kabiji baabile mba, "Inge akye kyatwajijila byonka bye, bonse banabakazhi bashala mu kyaalo kyonse bakasenda kyakumwenako kya inetu mutanshi."

152 Onkao mambo, abyoye bibena kumweka bufuku buno. Amiwa ntala pa bamo baabo banabakazhi. Naketekela kechi Nakonsha kukozha milanguluko yenu ne, nangwa byonka byo Nekyuba, Naketekela mba Nekyuba. Uu-uuu. Ibyo. Nakweseka kwikala yuwe musango wa inetu-mutanshi, na mbeyelo ya kupapakanya-mutwe. Amiwa kechi nakimonapo kintu kiji byobya mu bumi bwami ne.

153 Juba jikwabo kwajinga mwanamukazhi waishile ku shitolo ko Napembejilenga mukazhami, kabiji awa mutwe

wa mwanamukazhi wajinga *wabaya* byo bya, kabiji wajinga napechi mushi ya meso anji. Naambile mba, “Bwela, muntu wawama. Nsakwikala wawama.” Yajinga mwekelo yatama bingi. Yafwainwa kukuchinyisha. Kyo kika? Aye inetu mutanshi. Ke inetu mutanshi. Abo byokiji. Kabiji abo batola kyakumwenako pa kyokya.

¹⁵⁴ Kabiji lekai ng’ambe kikye pano. Amiwa kechi naji kwikyamba na kuseka ne, bino mu kishipi, pakuuba mba mwikimone. Abo kine anweba Benakilishitu bakulumpe byo mubena kuuba ku baabo banyike. Kine ibyo. Mwafwainwa kwikala ba kumwenako. Anweba ba Pentekosito mwamba mba tuji na Mupashi Wazhila, mwafwainwa kwikala kya kumwenako ba Methodist, ne ba Baptist, ba Presbyterian. Kechi nobe inetu mutanshi ne, bino nobe Yesu byo mwafwainwa kwikala. Aye wimubuula *Papo* byo mwafwainwa kuuba, bya kwikyuba. Twafwainwa kulondela mizhilo Yanji ne byakumwenako. Pano ajo jo jishinda ja kwiikitainamo. Eshita . . .

¹⁵⁵ Awe ina mfumu, kechi wakonsha kwikiteleka ne. Aye kechi wakonsha kwiya ne; wamulengeshe buvu. Waambile mba, “Inge—inge awe inetu mutanshi wa ntanda wapana kya kumwenako kiji byo bya, bonse banabakazhi bashala bakekyuba. Nanchi pano inge mwanamulume waita mukazhi wanji, aye ukamba mba, ‘Yanga utolokele mu mukola.’” Mwamona? Mulunda, aye kine waambijile jimo America, kechi ibyo nenyi? Pano, twatana kuuba mba, mu kuuba byo byo, nanchi kwajinga mwanamulume wajinga na milangwe pe aye, wayishile na kwisamba ne bamfumu. Aye waambile mba, “Kintutu kyakuuba ke kumupanga. Kabiji ne kutumanya mu kyaalo kyonse, ne kwita bonse babisungu bajiko, babisungu banyike, kabiji mu boonka ba ukasalemo mukazhi.”

¹⁵⁶ Kyamutokejile pa muchima mfumu. Nanchi watumenye, kabiji watumine balama batombo, ne bikwabotu, bayile na—na kusenda bonse babisungu babacheche bafikilamo, banabakazhi balamba mwaya bumfumu bwanji ne bibuji byonse byo alaminenga, abo bwajinga bwabaya bingi mu kyaalo kyonse kya panshi.

¹⁵⁷ Kabiji byo aubile byo byo, kyafikijile ku yuwe nsongwakazhi mucheche wa ki Yudeya. Aye wajinga nobe muntu-wasulwa, mambo, nobe ba Ngetila, mwamona, wajinga walengululwa lubaji lumo. Kabiji kechi wajinga ne bashanji ne bainanji ne. Kabiji Mondeka, bamwiso wanji bamusungilenga. Kabiji aye wayile, wafikijilemo.

¹⁵⁸ Kabiji byo baubile byo byo, batwajile baabo bansongwakazhi na kutokeshiwa pa bang’ondo bavula. Bebansashile kanukufu kabiji ne kwibawamisha konse kwafwainwa, ne kwibanengezha, pakuuba mba bafike ku mfumu.

159 Pano, akyo kijitu pamo nobe ntanda byo ikeba kuuba kipwilo leelo. Kwiwamisha na ntanda; ne kulondela bintu bya muntanda; na kweseka kutola bamembala bavula, ne kusenda kiji kyonse mu lumvwang'ano lwabo lwa bupopweshi. Ami! Ke kintu kilenga bingi lusa. Kabungwe kamo kukeba kushinda kakwabo, kusenda kiji kyonse kwikala ke membala wabo. Mwafwainwa kwibatwala mututwe tubungwe, bino kechi bakatwela mu lumvwang'ano lwa bupopweshi bwa Kilishitu ne poso batokeshiwa kabiji ne kusemwa jibiji ku Mupashi wakwa Lesa. Akyo kyakine. Bakonsha kwikala na jizhina jabo mu buuku, bino kechi Kokwa ne, mu Buuku wa Bumi wa Mwanamukoko, poso byanembwa na Mashi akwa Nkambo Yesu.

160 Banabakazhi bonse, benengezhe abo bene, pakuuba mba bamweke balamba. Kabiji, oo, Nalanguluka mba baji na mwekelo imo pe abo, kapepo kulondela inetu mutanshi ne bikwabotu. Beenengezhe abo bene mambo bayilenga na kumwekela ku meso a mfumu.

161 Nalanguluka mba bonse babena kwinengezha na lulwe lukatazho mu bipwilo byetu leelo. Babena kweseka kwiwamisha abo bene, na byantanda, kwikala na byamakayo bya muntanda, muji bintu bya muntanda, ne kuuba bintu byamuntanda, ne kukwatakana na ntanda, kasa balanguluka mba bafwainwa kusambakana na Mfumu. Lesa kechi untako muchima ku kyokyo ne. Aye washikwa byobyoy. Bino atweba tukeba kuuba byubilo bya muntanda.

162 Bipwilo byetu bimo, Naamba mba, banekenya bintu, kutola bakwasho, ne bikwabotu, mu kipwilo, kabiji kimye kimo ba kafunga, abo basongola bimye foolo nangwa bimye faivi, kabiji—kabiji bamo ba mwiabo bapepa fwaka. Baamba mba, “Abo—abo bakebileka. Bonse bakekalatu bulongo.” Mwatola muntu kufuma mu kikuulwa kya maalwa bufuku bumo, kabiji mwamubika mu pulupiti bufuku bwalondelapo. Amiwa kechi naketekela mu bintu bya yeo musango ne. Naketekela mba muntu wafwainwa kushinikishiwa, abyo ibyo, washinikishiwa. Amiwa ne mubuula, bimye byavula tutela . . .

163 Naketekela mu lubatizhilo lwa Mupashi Wazhila. Naketekela mu kwamba mujimi, bino Naketekela mba tukonkomesha kyabaya pa byobyoy. Mwanamulume wakonsha kwamba na jimi, kabiji mwanamukazhi waamba na jimi, pano inge bumi bwa mwanamukazhi ne bumi bwa mwanamulume kechi bya esakena pamo na jimi yo babena kwamba ne, nishi ke jimi yatama, mambo Mupashi Wazhila ukakulengela obewa kuuba byubilo nobe Baibolo. Ukakuleta ku kuyuula konse kwa kimino kya Kilishitu.

164 Mwatola muntu wamba na jimi, uji na bukaji bwabaya bwakulwisha ng'ombe mulume, kabiji ne kwamba pa bomwalamakana nabo, kabiji ne bintu byonse byonkabya.

Kika, mutela kyokyo mba Mupashi Wazhila? Kuuba kyaikala byobyo ne. Ine, mwane.

¹⁶⁵ Aye Mupashi Wazhila ke bukimote, lusekelo, mutende, kukoka muchima, buwame, lusa, butekanye, lwitabilo. Aye Mupashi Wazhila, ko kuuba mba kipangwa kya Mupashi, akyo Mupashi Wazhila kyo ekala nakyo mu Kipwilo kya Lesa mumi, buwame, kabiji kwikepesha, kwikepesha, kwitemwa umo ne mukwabo, kukoka muchima.

¹⁶⁶ Inge mulongo waya mungi, kechi mwakonsha kumupuma nangwa kintutu kikwabo ne. Yanga panyuma yanji umone kana wakonsha ku mubwezha. Kechi wafwainwa kupembelela musapwishi mba ekyube ne. Obewa kyube, muntu mukwabo. Musapwishi kechi wakonsha kwikyuba ne, nangwa madikoni. Muntu yense, ke membala wa yuwe Mubiji wa Kilishitu, wafwainwa kuya na kulondela mukwenu. Tuji na...Kabiji inge tuji na Mupashi wa Kilishitu mwi atweba...Aye wafunjishe kishimpi kikatampe. Basha naite naini, kabiji bayile na kulondela yewa umo. Abyo byo twafwainwa kuuba. Bino twaamba mba, "Oo, balekai bayenga." Atweba kechi twafwainwa kuuba kyokyo ne. Twafwainwa kwikala batekanya, ne kulekela mambo, ke kukoka muchima. Akyo kyo kipangwa kya Mupashi.

¹⁶⁷ Pano, twitana atweba bene, amba Eshita, panyuma ya... Bamubikile mu kifulo kimo, pakuuba mba ewamishe, pakuuba mba akemweshe kwi mfumu. Ami! Aye wakaine. Aye kechi wakebelenga ne. Aye wakebelengatu kuya byonka byo ajinga. Amena.

¹⁶⁸ Leelo tuji na bipwilo bikeba kuuba byubilo nobe ntanda, nangwa mambo akuuba mba tubaye. Lesa waambile mba, "Kimye kimo wajinga muचेचे, bamwingijilenga Aye. Pakuuba byo afikile mu bukulumpe, nanchi bamulubileko Aye." Abyo ibyo.

¹⁶⁹ Kimye kyo twajinga na kikopo mu mukwakwa kuno, na musakayi, kasa tumwimba na maboko etu; kabiji na kinda kyakala, kya mawaya; kabiji twajinga na mbung'eno ya pa mukwakwa, mwajinga bekepesha. Pakuuba byo twatatwile kwikala na bishimikwa bya fiili nangwa foolo milyoni dolla, ne bintu bikatampe bya yewa musango, nanchi twaikele bakwitota ne kulubako ku kyoykyo, abyo ibyo, kwi wamisha pamo na ntanda.

¹⁷⁰ Najinga pa kifulo kimo juba jikwabo ako, mulongo wa ku buzhile, kwajinga bantu ba mwingijilenga. Kabiji mwanamukazhi yense walupukile pa kimye kya koffii, na kukokoloka kwa-koffee, yense mwanamukazhi wajinga na suki ipi kabiji bapeta mivumbo. Pano, mwaamba mba, "Mulongo Branham, obewa kechi ujipo na mwingilo wa kwamba byobyo ne." Amiwa njinaji. Aye Baibolo waamba kyokyo. Abyo ibyo.

171 Bavula banabakazhi ba ki Pentekosito bamvuala byakuvwala byapashang'anya na bya mwanamulume, kabiji Lesa waambile mba ke kyabunya ku meso Anji. Abyo ibyo. Mwaketekela byepi kuya Mwiulu muyewa musango? Kimweshatu mba Mupashi Wazhila kechi ujimo ne. Inge Mupashi Wazhila wajinga momwa, Wafwainwa kukuzhachisha. Ibyo. Oo, wakonsha kubijika, ne kwamba mujimi, kunyema peulu-ne-panshi, kuzha mu mupashi. Amiwa namonapo ma Hindu kuuba kyokyo, ne ma Indian, ne bintutu bikwabo. Akyo kechi kijipo na kilumbululo ne, kanatu momwa mwaikala bumi bwa kukikizha kyo ubena kwambapo, bulume bwa Mupashi Wazhila, ne kulenga bantu baji na bumi ba bulesa. Awa ye Musongwa wa Kilishitu.

172 Eshita wailenga na kwikala musongwa, nanchi kechi wakebelenga nangwa kimo kya kwiwamisha kya muntanda ne. Aye wakebelenga kutwela, ku mfumu, byonka byo ajinga. Aye wimvwikile mwine nobe banabakazhi ba ki pentekosito byo bafwainwa kuuba, na mupashi wa kwikepesha. Kabiji bonse be bawama, bainetu batanshi byo baishile, na byonse byabo bya waina, mfumu wantajile pe abo, kabiji ne kwibabika mwakulamina batombo. Pakuuba Eshita byo aishile ku meso anji, kabiji aye wamwene buwame, kwikepesha, mupashi wa bukimote, aye waambile mba, "Awa iye. Yanga ukasende muchinya umubike ku mutwe wanji." Byokiji.

173 Balekai bemvike abo bene na yewa musango wa mupashi, kechi banabakazhi bonka ne, kana ne banabalume, ne abo, bemvike abo bene na yewa musango wa mupashi. Pano obewa watatula kwinengeza kwikala awa—awa Musongwa, wawama, wamushingi. Eshita walengele muchima wanji kwikala watokeshiwa.

174 Paji byavula byo tusakamana, biji pangye, oo, kwafwainwa kwikala byavula bya kufumya mikafi, kabiji ne byavula bya *bibye*, ne ku—kuya nabyo.

175 Kuno kimye kimo kunyuma, Naimene mu—mu mezhamo mu Tennessee. Napichile ku mpuzha imo icheche, kabiji ya mwesheshe mpeselo yonse ya mubiji wa muntu. Naambile mba muntu uneema ma paundi aduleendi fifite, mu busenga wafikijiletu maseti eite-foolo. Pano, obewa wi muntu umo, kechi byo uji ne, ma seti eite-foolo? Kabiji banabakazhi bamo bakekala, banabakazhi ba ki Pentekosito, bavwala kochi wa booya upotwa madola-faivi-aduleendi babwela baimika mutwe wabo peulu, inge yanoka, yafwainwa kwibebizha mu meema, kabiji kechi bafikilamo mu maseti eite-foolo ne, abyo ibyo, mu makemiko. Abo bo bukine, kechi kusekesha ne. Abo bo bukine. Eite-foolo maseti, pepi nobe wafikilamo kwikala pechi utoka wa kusasa ku kikumbi kya bazolo, kabiji kapepo ne kaushamo mucheche ne bikwabotu. Eite-foolo maseti, anweba mweshai kyokyo pepi pepi.

176 Inge mwaya pa nzubo ya majiila ne kutana. . .mwatambula nsanyi ya masuku kabiji mwatanwa tangatanga, mwakonsha kutwala ku kije bena yooya nzubo ya majiila.

177 Pakuuba mwaleka diabola na kuleta matelevizhoni akala amo muji ndochi ne bintu bya bitupa pa shingo yobe, ne kwibimina; bya kulengela kuvwala bimvwalo byandochi, abo banabakazhi, atwe tucheche twakwata pa mubiji tundeleshi nobe kabwa ye basuba kikoba, kabiji ne kwenda mumwe mu mukwakwa muyewa musango. Kabiji mwayuka, nyenga yami, Amiwa kechi mbena kwambila bisela ne. Kechi mwang'umvwisha bulongo ne.

178 Telekai. Mbena kwaamba kikye. Ubila muyekawa musango, kabiji pa Juba ja Buchibishi bwamambo ukabalwa nobe kende. Ibyo. Yesu waambile mba, "Yense utala pa mwanamukazhi na lwiso walenga kala bukende moka mumuchima wanji." Kabiji inge awa ndengamambo wakumbula pa mambo a kuuba bukende, ye ng'anyi wikyuba? Obewa. Wikilengejile mba kyubiwe? Obewa. Abye ibyo. Inge wibika popa obewa mwine, umwekanyikenga ku banabalume, kwikala nobe ntanda kabiji ne kuvwala nobe ntanda.

179 Naambile kyokyo kimye kimo, kabiji mwanamukazhi, Louisville, Kentucky, waambile mba, "Kyawama, telekai kuno, Mr. Branham. Amiwa nsakwimubuula pakuuba mba mumvwishe ponka pano!"

Naambile mba, "Ee, maama?"

Aye waambile mba, "Awa ye yenka musango wa mandeleshi obalenga."

Naambile mba, "Abo balenga mashinyi akutungako ne kupotesha bipe."

180 Ke mambo akuuba mba obewa ubena kukeba. Pajipo kintu kimo kyatama mwi obewa. Abye kine ibyo. Obewa kechi wikyuba mambo akuuba mba fwashonyi ne. Obewa kechi wikyuba mambo wafwainwa kwikyuba ne. Obewa wikyuba mambo ukeba kwikyuba.

181 Upepa mambo wikikeba. Obewa kechi wafwainwa kwikyuba ne. Naketekela mba kintu kyakila mu kukosama kyo Namonapo kala ke kumona mwanamukazhi mu mukwakwa, byonka byo mumona muntu yense, motoka, na mishanga yabikwa mu minwe yabo. Kika, ke kyabuvu. Aya ke ng'endo yabaisha ya ndoonda-yabutanu yo tuji nayo mu kyaalo, umvwe ba madokotala ne sayaasi wamichi waamba mba mwayulatu kaasa ne bintutu bikwabo. Kabiji bafyopatu pa bibye bintu, kimye kyonse.

182 Monai mwanamukazhi, wafwainwa kwikala Mwinakilishitu, waalala pa kitulu, nkowa na bantu bapusanapusana, wavwala kimvwalo kya kowelamo, waalala popa. Amiwa njina bansongwakazhi babiji. Amiwa kechi

naamba mba kuuba bekyuba ne. Baamba mba babena kutambula mute wa juba. Bakatambula mwaana-mute wa juba inge Nakikala na bumi. Ukekala mwaana wa yuwe *musango*. Mwamona? Kikekala ke mwaana wamulume wakwa Mr. Branham, na kipabi *kyalepa* byobya. Naketekela mba kyatama.

183 Nanchi twitela atweba bene mba, “Oo, atweba twi bamembala ba kipwilo kya Pentekosito.” Oo, buvu bwimukwate! Ibyo. Akyo kipwilo kya Pentekosito kikebewa kutokeshiwa, kufumatu kulutwe kuya ne kunyuma, kabiji kupita mu kibamba kya kufyamo bipe ne kibamba kiji panshi, kabiji ne peulu. Akyo kijitu bulongo. Kabiji nangwa byonkabyo, mu byonse bye, kyo kyakila buwame kyotuji nakyu. Bino kyakonsha. . .

184 Kijitu pamo nobe mu kupipulwa kwa bintu kabiji ne mu kimye kya kwa Yoano wa ku Arc, France wakebelenga muntu wa kupipula kwa bintu, kabiji pano bakebelenga wakupipulwa kwa bintu jibiji pakuuba mba bakonseshe bintu bimo byo bakainenga.

185 Kabiji kipwilo kya Pentekosito kibena kukeba kupipulwa kwa bintu. Ibyo. Kyakine kikebewa. Kukanwa kwa bintu byatama, ne kuswako bintu biji bulongo, amena, lubatizhilo lwa Mupashi Wazhila lwa kipyakipya: “Ke Kipwilo kya Kwinengezha akyo kine!”

186 Vulukai, kechi kikekala. . . Obewa kechi wakonsha kwamba mba, “Kyawama, pano, Nalamata ku *kikye*, kya ba Assemblies. Amiwa ne wa ku Foursquare, nangwa Kipwilo kya Lesa, nangwa Jizhina ja Yesu,” nangwa—nangwa bikwabo byashala. Ine! Obewa kechi wakonsha kutwela mukachi kabo ne.

187 Lesa wakwita obewa nobe muntu bunke. Kabiji ke obewa wafwainwa kwitokesha, mambo, “Aye ubena kwita bantu kufuma mu ba Ngetila, na mambo a Jizhina Janji, Musongwa Wanji, ba Ngetila.”

188 Eshita witokeshe aye mwine. Watokeshe muchima wanji. Abyo byo atokeshe. Abyo kipwilo byo kikeba: kutokeshiwa-kwa muchima.

“Wakonsha kutokesha byepi muchima obe, Mulongo Branham?”

189 “‘Omvwewa mu meema a mu Kyambo,’ kupichila mu Mashi akwa Yesu Kilishitu.”

190 Aye Baibolo waamba mba kyatama banabakazhi kuuba byobya byubilo, kabiji ne banabalume bebaleka mba bebyubenga. Akyo ke anweba bonse babiji. Mwanamulume ukaswisha mwanamukazhi wanji kulupuka mu mukwakwa kasa aji mulekese, wawala bya kumwala biji byobya, Amiwa njina munema wanji mucheche wakwikala mwanamulume. Aye ke utangijilwa. Abyo ibyo. Aye umwingijisha nobe kisapi

kyakala kyakovwa pa kindishi. Buvu bwikale ne obewa. Mwafwainwa kwikala banabalume.

¹⁹¹ Kabiji kafunga ukaswisha kipwilo kyanji kuuba byobya bintu, kwakubula kufumyamo manonokela ku pulupiti. Aye ke sisi. Kyo tubena kukeba ke banabalume, Mamboawama, kechi na makalapusi apulasitiki ne, pakuuba na bulume kabiji ne kumweshwa nyingijilo ya Mupashi Wazhila, na Kyambo. Aye Baibolo waamba mba abye bintu byatama. Kyatama bantu kuuba byobya, kuuba byobya byubilo. Kyafwainwa kusapwilwa, ne kwibwikala, kabiji konse konse. Nangwa, kipwilo kikeba kovwewa, kutokeshiwa.

¹⁹² Eshita waovwele muchima wanji ku meso akwa Lesa, waendele na mupashi wa bukimote ne kwikepesha; akyo Kipwilo kikekala Musongwa wa Kilishitu. Pano, vulukai, Eshita wakaine kwiwamisha kwa muntanda. Aye watolele Mupashi mu muchima wanji, pakuya ku meso a mfumu.

¹⁹³ Kabiji mwanamukazhi leelo, kipwilo kilanguluka mba kikatwela mambo baji na manambala avula, jo jibumba jakila kuvwala bulongo, uji na kabungwe kabaisha bingi, kipwilo kyabaisha mu muzhi, kabiji ne bintu biji byobya, mu kekitupila ma milyoni avula bingi inge mwaketekela mu kyokyo.

¹⁹⁴ Ke kintu kyawama, kya lusa, ke mupashi wa munema ku Kyambo kya Lesa, “waomvwewa mu meema a mu Kyambo,” kabiji ne Kyambo mwi obewa. Ke komvwewa. Amena. Kipwilo kikebewa komvwewa, komvwewa na Mamboawama-atuntulu. Abyo ibyo. Kechi ke komvwewa lubaji lumo ne, pakuuba ke komvwewa na Mamboawama- atuntulu, batokeshiwa, “balengwa bu bilengwa bipya mwi Kilishitu Yesu.”

¹⁹⁵ Musongwa wa Yesu kechi ke musongwa wabiko ne. Aye kechi ukekala na Wanji wabiko ne, Musongwa.

¹⁹⁶ Inge mwanamukazhi waiya na kusongolwa, kabiji wamweka nobe wafuma mu kipaka kya bangulu; mwanamulume uji na mushingi naji, kechi wakonsha ku musongola ne. Wakonsha kwitokeshwa aye mwine.

¹⁹⁷ Kabiji umvwe kipwilo kya Kilishitu kyaiya na kusongolwa, kilanguluka mba kikekala Musongwa, na bya kwikobaika byantanda pe aye, Musongwa wa Kilishitu kechi ukekala byobyoye ne. Ine, mwane.

Nafwainwa kupelawizhako.

¹⁹⁸ Nangwatu Kipwilo kya Kilishitu, kya Nkambo Yesu Kilishitu, akya Kipwilo kechi Kipwilo kyatabauka ne, nangwatu, na bisapi-byatabauka bya madinominesheni ne. Aye kechi wafwainwa kwikala membala wa dinominesheni mukatampe ne. Aye wafwainwa kwikala waovwewa-na Mashi, wapotwa-na Mashi. Kechi kwaamba mba atweba twiba mu kipwilo kyabaisha ne, kabungwe kabaisha, nangwa

bibye, byobyaya, nangwa *kikwabo*. Wafwainwa kwikala watoka, watokeshiwa, wazhila, wabulwa jitomya nangwa jifunye ne, na Mashi a wanji—a Mupulushi wanji, Yesu Kilishitu.

¹⁹⁹ Nobe Eshita, Muntu wafyamika mu muchima, Muntu wafyamika, bukimote kabiji ne lusa lwa Mupashi wakwa Lesa, mu muchima wa muntu; kechi lukumo ne kabiji ne kifulo kya ntanda ne.

²⁰⁰ Amiwa kimye kyonse ng’amba mba ntanda isama; Mamboawama atema. Oo, ke kupusenamo kwa mamilyoni. Hollywood ubekauka; Kipwilo kya Kilishitu kitema na butemwe, kabiji ne kunekena, kabiji ke buwame, ne lusa. Abyo ibyo.

²⁰¹ Eshita kechi wakebelenga kwiwamisha aye mwine na vwajilo yakatataka ya muntanda. Ao kechi wakonsha kumweka nobe mukazhi wa mfumu ne.

²⁰² Kabiji atweba, kasa tukeba kwikala pamo nobe ntanda, kabiji wafwainwa kumweka nobe Mukazhi wa Mwanamulume Wazhila? Atweba, nobe Kipwilo kya Lesa mumi, twivwika atweba bene na bintu bya muntanda, kabiji pano wamweka nobe Mukazhi wa Muntu Wazhila? Bushe awa wafwainwa kumweka nobe kintu kimweka kitemwa nyi?

²⁰³ Inge mwamona mwanamulume leelo, wafwainwa kwikala mwanamulume wazhila; awe ke eye mukazhi wanji, nobe inetu mutanshi, umo uji nobe yewa uba masuki akatampe aji *bibye*; kabiji ne bintu byachiluluka ku lubaji lumo, kabiji mazhamatamba ku lubaji lumo, kabiji—kabiji wamweka nobe bamwimba pakanwa na mbulasho wa kupetelako; kabiji ne byonse bintu bya musango yewa, na kwenda mu mukwakwa, mu bicheche bimwalo-byakwata ku mubiji byobyaya; kabiji ne tunshiko *twalepa* byobyaya, na kuzhobaka pa kuya, na kuzhisha mubiji momwa mu mukwakwa; ne kwamba mba, “Awa ke mukazhi wa muntu wazhila”? Amiwa kechi mbena kwamba bisela ne. Amiwa mbena kwambatu ng’ambilo.

²⁰⁴ Naiya ku umo wetu waki Pentekosito mukatampe, kuno kechi papita kimye kyabaya ne. Najinga na tente waimikwa. Kabiji kafunga wang’ambijile mba, amba, “Mukazhi wami ke wimba piyano.”

Naambile mba, “Akyo kyawama, mulongo.”

“Bushe mwataako muchima mba embenga?”

Naambile mba, “Ine. Ine, mwane. Amiwa kine kechi nguba ne.”

²⁰⁵ Kabiji waile ku mukulumpe. Mukulumpe waambile mba, Mulongo Baxter, ne kwamba mba, “Akyo kijitu bulongo.”

²⁰⁶ Aye waambile mba, “Mulongo Branham, iya kuno. Nakeba obewa kukumanya mukazhami.” Kabiji Naile konka.

207 Nasashijila ndekelaiko mambo. Mwamona? Amiwa kechi mbena kweseka ne, tulengai kwikala—ng’ambilo. Amiwa mbena kweseka kwamba ng’ambilo. Mwamona?

208 Kabiji mwanamukazhi wajinga na busendwe bwakupeta ku maboko. Amiwa kechi nayuka ne. Abya bintu, mwayukatu, byonse byabikilwe bulongo, kabiji Amiwa kechi na kimonapo bya byobyo mu bumi bwami ne; kabiji ne ndeleshi yalepa yafika peene panshi *papo*, kwakubula lubaji lwa nyuma ne, kabiji kechi yajingapo na mufuko kunshi ne. Kabiji Amiwa—Amiwa kechi na kimonapo mwenkelo ya musango yewa mu bumi bwami ne. Kabiji wajinga na masikiyo akatampe ankobama nobe *bibye*, kabiji ne bintu byavula byo ajinga nabyo.

209 Kabiji Nakeketele kuzhokoloka. Nalangulukile mba, “Oo, ami!” Amiwa ne Baptist, kabiji Nayuka kyakila kuwama pa kyokyo. Natajile jibiji. Naambile mba. . .

210 Pano, nasashijila, akye kechi kyakusekesha ne. Bino Amiwa ne kyambile ku mulongo, kabiji Naketekela kyamukwashishe. Kechi ne kyambila kuuba mba mpusaneko ne; inge Nauba kyokyo, Amiwa nishi ne kafutufutu, monai, nakebelenga kwiwamisha, amiwa mwine.

Naambile mba, “Anweba, bushe mwajikwamba mba mukazhobe wajinga wazhijikwa nyi?”

Waambile mba, “Oo, ee.”

211 Naambile mba, “Ubeni kumweka nobe kechi byo aji, kwi amiwa ne.” Naambile mba, “Amiwa—Amiwa kechi nakimonapo kala yoya mwekelo mu bumi bwami ne, nobe mukazhi wa wamwingilo. Aya kechi imweka nobe mwenkelo ya mukazhi wa muntu wazhila ne.”

212 Kabiji nangwatu kipwilo kya Lesa mumi ne, mwayila bya mafwashi anji, bijilo byaji bya makabe, ne bijilo bya kajo, ne bisela bya bitupa, ne mazha, ne makayo, na kwiwamisha aye mwine byobya, na ntanda, na kumweka nobe Musongwa Wazhila wakwa Lesa. Inge wapepa mishanga, ne mazha, ne bijilo, ne bijilo bya masuku, kabiji ne tomeno ya maalwa, kabiji bonse byonkabya, kabiji kasa bamba mba ba Musongwa wa Kilishitu? Kechi bamweka nobe Mukazhi wa Muntu Wazhila ne, kwi amiwa. Ine, mwane. Aye kechi wakonsha kusala kintu kya musango yewa ne. Wafwainwa kutola mwanamukazhi uji bulongo, uji na mwekelo iji nobe kyokya kyo Aimenako. Naketekela mba akyo kyakine. Akyo kyakonsha kuko Zhang’ana pacheche.

213 Maama wami wakala wa ku kabeta kabulenge waya. Kimye kyo Najinga nsongwalume mucheche, twaikalanga na. . . Kechi twajinga na bya kuja, nangwa pachechetu ne, kabiji twajinga na kunde-ifita ne shinkwa wafuma ku mataba. Amiwa kechi nayuka kana mwibiyuka byo biji nangwa ine. Nanchi kechi twajinga. . . Abo kechi bajinga na ngilishi mu mwaka yense

ne, kabiji twatolanga pepi nobe panyi wakala mukatampe uji *bibye*, ne kubikapo bikoba bya nyama. Twayanga ako ko bakonsha kuchiba, nangwa mu mambucha mo bafumyamo nyama ne kwitupa kikoba. Kabiji twikifumyako, twatola ngilishi, twaitulwilapo.

²¹⁴ Pakibelushi pa Kibelushi bufuku, bamaama baambanga mba tubena kukeba kipimo kya manyi ankasita. Kabiji Amiwa—Amiwa kechi nakonsha kutemwa byobya bintu ne. Nangwa byokabyo Amiwa ne bijanga. Naiyanga kwi abo, kasa nakwata myona yami *bibye*. Ne kwamba mba, “Maama, Amiwa—Amiwa kechi nakonsha kwi bija ne.” Naambanga mba, “Bindengela kukolwa bingi.”

Abo baambanga mba, “Inge kechi byakubeleka ne, kechi byauba bulongo kwi obewa ne.”

²¹⁵ Nanchi Nalangu luka mba abyo byo kiji na kusapwila Mamboawama. Inge Byabula kukusukanya pacheche ne, tolai byenu...mwaikala na ng’umvwino ya bumupashi yatatula munda, yakulengela wamolwako pacheche, pakuuba mba wipime obewa mwine na Baibolo: umone kana akwa kuzhingila kwakala, ne kwitemwa, kubulwa bulesa, butemwe bwa muntanda, televizhyonyi, ne bintu mu kimye kya bufuku; kabiji kipwilo kyaikala mwabula bantu, ne pa bipona paikala pabula bantu. Kimye, kya kwikala byobya nobe Yesu, watambula Mupashi Wanji mwi obewa, na kweseka kusenda muntu yense mu kyaalo kwiya ku kipwilo kyobe, na kutambula Kilishitu? Kabiji ketwitele atweba bene mba twi Musongwa wa Kilishitu? Oo, kyumvwanika lusa, mulunda!

²¹⁶ Kimye kyafika. “Musongwa Wanji winengezha kala Ayemwine.” Oo! “Winengezha kala Aye mwine.” Aye wibilekele byonse bye bintu. Vulukai, Eshita wajinga wasalululwa, kabiji bakwabo bakainwe. Kabiji bonka basemwa jibiji, bo baji na Mupashi wakwa Lesa, bo bakekala Basalwa mu joja Juba, kya kuuba mba muchinya wa lukumo ukabikwa pa mutwe Wanji. Kabiji bakwabo bakebakana.

²¹⁷ Lekai ne mubuuleko kintu kimo kyamwekele. Ami—Ami, Amiwa ne mishonale, nobe byo mwayuka, kuuba mwingilo wabusapwishi, mwingilo wabumishonale, pepi nobe bimye sebeni bushiyya bwatulunga, kuzhokoloka ntanda. Kuno, kechi papita kimye kyabaya ne, mu muzhi wa Loma, Loma ye muzhi mukatampe wa byakulengalenga. Kabiji bajinga na sukuulu wa bya kulengalenga kokwa, kabiji bavula banyike betu bena America baya konka pa mwaka pa mwaka, mu kupwisha mwaka umo-nangwa-ibiji na kufunda byakulengalenga, na kufunda kupeta bipikichala. Kwajinga jibumba ja banyike bena America baishile kokwa, myaka icheche yapitapo, nobe byo bambujile jishimikila. Kabiji umvwe bafika kokwa, bayatu mu ntanda nobe ngulu-mulume. Umvwe baji mu Loma, booba nobe byuuba

beni Loma: balupukamo na kutoma, ne kwivula abo bene, kabiji ne bintu byonse bikwabo, kabiji ne kutwajijila, bonnse basongwalume ne basongwakazhi.

218 Kabiji kwajinga sukuulu umo. Kabiji mu yuwe sukuulu, aje—aje jibumba ja beni America banyike jaishile. Kabiji bonsetu mwiabo, pepitu, baubiletu kintu kimo. Bino umo nsongwakazhi muheche, kechi waswishishe kyokyo, nangwa pachechetu ne. Aye waikela. Mukimye kya bufuku, watangilenga mu kimye kyo batomenenga bonse. Kimye kya mute, aye waingijilenga, na kufunda. Kyawama, aye bamusekelenga ku sukuulu yense. Kabiji wilamine aye mwine nobe inetu, byubilo byanji byaubile nobe bya inetu. Nangwa kwajinga bansonwalume baki Loma kabiji ne bintu byonse bikwabo, na kweseka kumulupula, aye wikikaine. Ine, mwane. Aye waiketetu na byakufunda kwanji, kufunda kulenga, kabiji ne kupeta, nangwa byonkabyo. Kabiji waikela nabyo.

219 Kyapelako, kalama wa yoya mpuzha wamutajilengatu, pakumona wajinga wapusana bingi, nangwatu wajinga Katolika wa ku Loma, watwajijiletu na kumumona, mujishinda jo elamijilemo. Juba jimo mabaanga abufuku, nsongwakazhi mwanyike, mu mpuzha amo—amo mwajinga nzobo ya mabilabila, kika, nangwa mpuzha amo mwajinga sukuulu, aye walupukile momwa mulubaza wa sukuulu, kabiji wakajijile peulu ya katumba, ne juba jailenga nakuzhika. Kabiji waimene byobya, na kyanji kyawama, kilungi kyawaina, kabiji suki yanji kasa ipeepela, kasa atajisha kubushiya bwalubaji *lwa* konka kuzhikila juba.

220 Awa kalama wakala wapyangilenga mwaya lubaza. Aye watwajijiletu na kumuntajisha nsongwakazhi, mu kimye kyo apyangilenga. Kintu kimo kyatwajijiletu na kumubuula mba, “Yanga, ukesambe nanji.” Nanchi watujile leki panshi, watolele kisochi kyanji kyakala, waendele kuya kwajinga nsongwakazhi. Wawamishe pashingo yanji. Aye waalulukile. Aye waambile mba, “Ndekelaiko mambo, inetu.”

Aye waambile mba, “Ee, mwane. Kyakine.”

221 Kabiji wamwene mba wajijilenga. Bonse bashala balupukile kuya na kwiyowa kwa bobwa bufuku. Aye waambile mba, “Maama, Naketekela mba anweba musakukwatakanya mu jishinda jaitabilwa bulongo, Amiwa nsakwisamba ne anweba.” Waambile mba, “Anweba mwaikala kuno, pepi nobe myaka ibiji pano. Kabiji Namona jibumba jo waishile najo, batwajijilatatu kuya mu bijilo, kabiji kubwela bimye byonse bufuku, bapendwa, bavula byakuvwala lubaji lumo, ne bintu byonse. Bino Namona mba obewa kechi utanwa ku byobya bijilo ne.” Kabiji waambile mba, “Na—Namona mba, kyamwekanyika bingi, amba obewa kimye kyonse ubena kutala kubushiya bwa kalunga. Ano mabaanga abufuku, waiya kuno, ne kwimana kuno kila

mabaanga abufuku, kasa umona juba byojizhika.” Kabiji waambile mba, “Kika, kika kilengela kyokyo?” Waambile mba, “Amiwa ne muntu mukulumpe. Kabiji Ami—Amiwa nantako muchima kukeba kuyuka kintu kilengela lulwe lupusano pakachi nkobe ne bakwenu.”

²²² Aye waambile mba, “Ee, mwane.” Aye waambile mba, “Mwane, Mbena kutala ku muzhi umvwe juba kejiye nakuzhika.” Aye waambile mba, “Kubushiya, kukila pa joja juba kuji muzhi wami.” Kabiji aye waambile mba, “Mu yoya ntanda kuji kibuji kimo. Kabiji mu kyokya kibuji muji muzhi umo. Kabiji mu yewa muzhi muji nzubo imo. Kabiji mu yewa nzubo muji nsongwalume umo.” Waambile mba, “Aye, ne aye, ke sendwe ulenga byakulenga. Byo Nafumineko, kwiya kuno, Nalaile butemwe bwami kwi aye. Twikobekela umo ne mukwabo.”

²²³ Kabiji aye waambile mba, “Nangwatu bashala bobbe byamusango ka, akyo kechi kijipo na kintu kimo kwi amiwa ne.” Aye waambile mba, “Nalaile kwikala wakishika ne koloka.” Kabiji waambile mba, “Amiwa mbena kukabila joja juba jo Mbena kwiumvwa amiwa mwine peulu ya byapi bya yoya ndeke ikatampe ayo ikakilang’anya kalunga ne kufikizha pa kibaza kyandeke apo po akankumanya. Aye ubena kushimika nzubo, kabiji tukekala pamo mu yoya ntanda.”

²²⁴ Kabiji waambile mba, “Ao oene mambo o Naikela mujishinda jo Ngubilamo. Amiwa ne wakishika ku mulaye ye Nalaile ku nsongwalume. Kabiji aye wakishika ku mulaye ye andaile amiwa.” Waambile mba, “Ngumvwa kwi aye, pa kimye pa kimye, kabiji Namunembela, kabiji,” waambile mba, “tushilang’ena umo ne mukwabo. Twakitwajijilatula na kulama luchipo lwetu, na kupembelela juba ja kukumana.”

²²⁵ Oo, akyo byo kyakonsha kuba ku Mwinakilishitu wakine, pakuuba mba afume ku bintu bya muntanda. Kabiji juba jimo, mwamba mambo akwiya pa kito, pa byapi bya Nkunda! Aye ubena kunanga Musongwa, umo ubula kukosamikwa na ntanda nangwa na bintu bya muntanda ne. Aye waovwewa na Mashi akwa mwanamukoko. Aye walaya Bwanji—Bwanji butemwe kwi Aye yenkatu. Butemwe bwa ntanda bwaya kabiji bwafwa kwi Aye. “Masongola a Mwanamukoko afika, ne Musongwa Wanji winengezha kala Ayemwine.”

Twayai tulanguluke pakikye kimye kyo twakunyika mitwe yetu pa kakimye kacheche.

²²⁶ Juba jimo, byo Mbena kutala kuzhikila juba, Ami namiwa, myaka sate-wanu yapitapo, na laile Umo ye Natemenwe, butemwe bwami bonse kwi Aye. Amiwa kimye kyonse naeseka ku mulamina Aye ne Kyambo Kyanji, konse Amiwa nkongya. Nayuka mba kuji bakwabo bavula baikala muno, byonka bya, na kupembelela joja juba ajo bwato bwakala bwa Ziyona bukeya

pa kito, ne kutola myeo yetu ne kwitutwala mu Kyeenyi kya Aye Ye twatemwa ne kulaya butemwe bwetu.

227 Muno mwafwainwa kwikala bamo bufuku buno, abo bakyangye kulaya ne. Kujipo bamo belulaile kabiji belonauna. Inge muji mu yewa musango bufuku buno, mulunda, kika kyo wabujila kubwela bufuku buno ne kubwezhapo mulaye? Inge kechi uji byo byo ne, kyubai. Kika kyo wabujila kwiya na kwikyuba bufuku buno? Ambai mba, “Nkambo Yesu, Nemutemwa Anweba.”

228 Vulukai, inge mwalaya kala, kabiji akwe kasa mubena kumvwangakana na bintu bya muntanda, Yesu kechi ukekala na musongwa uji byo byo ne. Aye kechi ukekala na umo kende ne. Butemwe bwenu bonse bwafwainwa kwikala kwi Aye. Kabiji umvwe watemwa bintu bya muntanda, ne mafwasho a inontanda, kukila byo watemwa Lesa, nanchi obewa kechi winengezha obewa mwine ne.

229 Bushe awo muntu uji muno bufuku buno, mu kimye kyo twakunyika mitwe yetu, sutulaiko kuboko kwenu, ne kwamba mba, “Mulongo Branham, ndombeleleko. Nasaka kwikala muyewa musango. Na—Nasaka kwikala lubaji lwa Musongwa. Kabiji Nayuka mba Mbena kuuba bintu byo Nafwainwa kubula kuuba. Ndombeshapo?” Lesa akupeshe, nyenga yami mwina India. Lesa akupeshe, nyenga. Kabiji obewa, mulongo wami. Kabiji obewa, mulongo. Uji yense? Sutulai kuboko kwenu, ne kwaamba mba, “Ndombeshapo, Mulongo Branham. Ami—Ami—Ami—Ami nayuka mba kechi Nji bulongo ne.”

230 Pano ikalaitu wa bukishika ne obewa mwine. Talai kunyuma pa bumi bwenu. Mwafwainwa kutala kunyuma kasa mukyangye kuya kulutwe. Talai musango ye mwajingamo. Talai mupashi ye mujinaji wimulengela kuuba byo byo. Inge kechi muji byo byo ne. . . Inge witumbijika kwikala Mwinakilishitu, kabiji ukikwatakana na bintu bya muntanda, mulongo, nyenga, wakonsha kwikala byepi kana mpofu inge wabula kumona mba waya mungi?

231 Muntu umo waambile juba jikwabo, waambile mba, “Mulongo Branham, wafwainwa kufuma pa bantu bayewa musango.” Waambile mba, “Bantu bakutela mba ngauzhi.”

Naambile mba, “Amiwa kechi ne ngauzhi ne.”

232 Waambile mba, “Bino bantu balanguluka mba byo byo uji. Wafwainwa kufujisha babo banabakazhi. Mukifulo kya kwibabula mba bavwalenga suki yalepa ne byakuvwala byafwainwa kabiji ne bintu byamusango yewa, mwafwainwa kwibabula byo bafwainwa kutambula bintu bya bumupashi.”

233 Naambile mba, “Nakonsha kwibafunjisha byepi samushi, kasa babula ne kutola ABC’s, sukuulu wabanyike? Kechi baji na milanguluko ya itabilwa pakuuba mba bewamische abo bene ne, kwita, ‘Awa Musongwa wa Kilishitu!’” Amiwa kechi mbena

kwamba mba myendeleo ne. Amiwa mbena kwamba kyokyo mu butemwe bwa bulesa.

²³⁴ Nobe byonka byo Najikwamba lukeelo luno, inge Nakumona kasa uya ku mukola mu bwato, kabiji namona mba musakwiimba ku mpota, abwa bwato kechi bukovwa ne, amiwa byo nkabijika kwi obewa kabiji ne kwita pe obewa, Amiwa kechi mbena ku kukozha ne. Nakutemwa obewa. Mambo, inge wabula kuba byo byo, bumi bobo bukalubilamo.

²³⁵ Pajipo mukwabo umo, sutulai maboko enu kasa tukyangye kulomba? Nakumona, kunyuma koko. Lesa emupeshe, kabiji anweba, anweba. Mwayuka bumi bwenu bumwesa mba watamisha. Anweba mwakitemwa ntanda kukila Lesa, nishi pajipo kintu kimo kyatama pantu pamo. Talai pe anweba. Mubibamba bikwabo, sutulai kuboko kwenu, ne kwamba mba, “Ndombeshaipo, Mulongo Branham.” Lesa emupeshe. Lesa . . . Abyo ibyo. Kyakishika kuya ku buwame, Amiwa—Amiwa komoka bukishika.

²³⁶ Alo lolukatazho luji na kipwilo kya Pentekosito leelo. Kechi tuji na bukishika bwine bwine bo twaikalanga nabo ne. Atweba kechi tuji na kuchichika kwa—kwa kwiya na kwamba mba, naswa twatamisha ne. Diabola wakwachijila kipwilo kyakuuba mba babena kwalang’anatu mu mateshi a muntanda. Kuuba kyokyo ne.

²³⁷ Bumi bobo obewa mwine bushinikisha mba kechi uji nakyo kyo wamba mba uji nakyo ne. Pano kika kyakubujila kwikisolola? “Awa ukasolola bubi bwanji ukalekelwao: aye ufyu bubi bwanji kechi ukamona byawama ne.” Anweba kechi mwakonsha kwikifya ne. Lesa wayuka byonse pa kikye. Kabiji inge wamona ne kuyuka mba kechi ubena kwikala bulongo ne, nanchi kika kyakubujila kwibusolola, ne kwiya patoka pakuuba mba kyapwa?

²³⁸ “Bantu bamo bubi bwabo butangila palutwe yabo; bamo bulondela.” Lekai bwami buye palutwe. Lekai ng’ambe bwami ponkapano. Lekai Lesa ekitambule. Abyo byo twafwainwa kuuba.

²³⁹ Kuji pepi nobe maboko sikisi nangwa eiti asutulwa. Kine muji avula kukila pa aao mu kino kipwilo kicheche, bufuku bunu, mu baji aduleendi nangwa bantu- babiji muno, nangwa kapepo aduleendi fifite. Lesa akupeshe, mwanamulume wakyanyike. Pano, Lesa akupeshe, inetu. Lesa akupeshe, nyenga. Abyo ibyo. Lesa akupeshe, mwaana. Akyo kyawama.

²⁴⁰ [Kafwapo bijipo pa tepu ne—Waku.] . . . -kosito banabakazhi kechi batendanga suki yabo ne, bino bekyube leelo. Kika kyamwekele? Abo kechi balenganga . . . baubanga—baubanga byakupetapeta ne. Bainenu kechi bekyubanga ne, inge bajinga ba pentekosito. Kika kyamweka leelo? Mambo babena kukaya mu bintu bya muntanda. Kabiji ntanda itala kwi atweba.

Twamba mba atweba twi Kipwilo kyazhila. Lukatazho lweepi? Atweba kechi tumweka nobe Musongwa wa Kilishitu ne. Nobe anweba banabalume muji kooko, kintutu kimo. Mulongo, buvu bwimukwate.

²⁴¹ Taata Wamwiulu, inge Natala konsekonse, ne kwita bantu kukitapisho muyewa musango, kwibakajipila, kwibachibaula, kimweka nobe wanshita bingi. Bino mukachi kami mubena kusuma mashi, byo Nayuka mba tubena kufwenya kwipi ku mpelo. Ao mato acheche akalajika, juba jimo. Lufu lukafika, ne bya makondo. Kabiji bimye binga byo Naitwa ku lubaji lwabo, kabiji ne kwibomwa kwamba mba, “Oo, Mulongo Branham, inge Nakonsha kwikyuba ne jikwabo.” Nanchi, mu kimye baabo kyo bakonsha kwikyuba, Nkambo, kwikyuba bulongo!

²⁴² Amiwa mbena kwesekesha na ngovu yami. Lesa, lekai Mupashi Wazhila ekisolole ku bantu, amba Amiwa mbena kwesekatu kwibakwasha, kechi kwibalengulula ne. Bino, byonka byaambile Paulo, wakala! Lesa, Amiwa kechi mbena kukeba kwibakozha ne, bino mbena kukeba kwibakozha kyabaya pakuuba mba bamone po balukanya.

²⁴³ Nalomba mba Anweba musakuswisha, bufuku buno, aabo bantu, babena kusutula maboko abo, na—na munema wabaya wa—wakuyuka, kumeso a Lesa, amba baji mu kilubo, kabiji bakeba kukeba kuuba bulongo. “Kebai, kabiji mu kekimona. Kokooshai, bakemushikwilako.” Pakuuba uwwe anweba mwabula kukokoosha, Aye wafwainwa kushikulako byepi? Anweba kechi mwikikeba ne, mwakonsha kwikitana byepi?

²⁴⁴ Lekai Mupashi Wazhila, Nkambo, letai babo bantu bepane kyapwijiika kwi Lesa, bufuku buno. Lekai Taata mukatampe wa Nkambo yetu Yesu Kilishitu ebazhijike, mweo, mubiji, ne mupashi, kabiji ne kwibabika mu Mubiji wa Nkambo Yesu Kilishitu. “Mambo masongola a Mwanamukoko afwenya pepi, ne Musongwa Wanji winengezha Ayemwine.” Anweba Nkambo, lekai buno bwikale ke bufuku bwa kwinengezha, mambo ja keesha jafwainwa kwikala juba ja kumukumanya Aye. Atweba kechi twayuka kimye kyo tuketwa kumukumanya Aye ne. Kiswishai kye, Nkambo.

²⁴⁵ Pano kimye kyo Mbena kulomba, kabiji muji na mitwe yenu ya kunama panshi. Anweba bonse bajikusutula maboko enu, inge mwaikala na bukishika na kyokyo, kabiji mwashininwa nakyo, kabiji obewa kechi umvwa buvu ne lekai bantu bayuke mba baya mungi! Obewa ukemana nabo kokwa ku Kije, nangwa byonkabyo. Kabiji Lesa wabikamo kushininwa kwabaya mwi obewa, kyakuuba mba wayuka mba waya mungi.

²⁴⁶ Kuno kimye kimo kunyuma, Nasapwijilenga kintu kyayewa musango. Naambile ku inetu mwanyike waimana kuyuma kokwa. Aye wamwekelenga kutama bingi, mwana wamukazhi

waawa mwingilo. Kabiji wankumenye pangye ya kipwilo, kabiji kechi wanshijile aye ne! Aye waambile mba, “Obewa kilubi.” Mucheche, inetu, wa mivumbo-yapetwa; waipipa, suki yo baluka. Aye waambile mba, “Inge Mbeni kukeba muntu umo kwamba kwi amiwa pa kyokyo, Nsakusenda muntu umo uji na maana.” Waambile mba, “Kechi wakonsha kwiya mu pulupiti wa ba taata ne kusapwila kintu kiji byobya jibiji ne.”

²⁴⁷ Naambile mba, “Mwatazha mukuuba mba, bashobe, musapwishi wawama waki Baptist nobe byonka byo anji, kechi wakonsha kusapwila pa kyokyo ne?”

Aye waambile mba, “Aye kechi wakutewile mba wiye kuno ne. . .”

Waambile mba, “Aye kechi watewile, nangwa pachechetu ne. Amiwa naiya kupichila mu nkuteula.”

Aye waambile mba, “Amiwa kechi nakakulekelako mambo pa kikye ne.”

²⁴⁸ Naambile mba, “Akyo kiji kwi obewa. Amiwa nalondelatu Mamboawama.” Bipuupu bya malozi byasukenenga kokwa na mwela mucheche. Walamba mwanamukazhi mwanyike.

²⁴⁹ Palutwe kacheche, pepi nobe mwaka umo palutwe, Napichile mu muzhi. Namwene awa inetu yeka umo mwanyike na masiketi anji alepa, na kupepa fwaka, kasa abena kuya mu mukwakwa. Nalangulukile mba, “Awa ke mukazhi wa Mulongo *Kananga-ne-kananga*, nangwa, mwaana wamukazhi.” Naendele kukilang’anya mukwakwa, kumona kana Nafwainwa kufika kwi aye.

²⁵⁰ Aye wantajile kei amiwa, kasa apepa yuwe kasanga, na kulupula bwishi mu myona yanji. Aye waambile mba, “Byepi, musapwishi,” na ng’ambilo yabulamo mushingi, byobya.

Naambile mba, “Kyawama, kyawama!”

Waambile mba, “Ndosako ku kaako kashanga kami. Ikala nobe mwanamulume.”

Naambile mba, “Obewa kechi wiumvwina buvu obewa mwine ne?”

²⁵¹ Wakujiile mu pokochi wanji, ne kwamba mba, “Nanchi tambula kasanga.”

²⁵² Naambile mba, “Buvu bwikale pe obewa. Buvu bwikale pe obewa, pakupana kashanga ku kalume wakwa Lesa.”

Aye waambile mba, “Nanchi wafwainwa kutoma mu botolo wami.”

Naambile mba, “Nasashijila kwi kyamba kyo ne.”

²⁵³ Nantajile pe aye. Amiwa nakakelwe kwikanya kujila, mambo bashanji ke muntu wawama. Nantajile pe aye. Nalangulukile mba, “Oo, ami! Walanguluka mba uji na kimye kyabaya bingi.”

254 Natatwile kwenda kuya. Amiwa kechi nakonsheshe kukanya mipolo mu meso ami ne. Naendele kuya. Aye waambile mba, “Pembelaiko mineti umo.”

Naambile mba, “Ee, maama?”

255 Aye wabwelele lunyuma. Kyajinga nobe kintu kyabuvu kwisamba nanji pa mukwakwa, bantu kasa babena kupita. Aye wafikile konka. Waambile mba, “Wayuka kyo wang’ambijile bobwa bufuku nyi?”

Naambile mba, “Amiwa kimye kyonse kavuluka.”

256 Waambile mba, “Nasaka kukubula, musapwishi, wajingatu bulongo.” Aye waambile mba, “Namufichishe pa muchima Mupashi Wazhila kimye kyapelako.” Pano, aino yo ng’ambilo mwanamukazhi yo aambile kwi amiwa, kabiji Amiwa kechi nkalubako ne, kimye kyonse Amiwa kyo nkekala na bumi. Aye waambile mba, “Aye waingijilenga pamo ne amiwa bufuku. Bino,” waambile mba, “byo Namukaine mukyokya kimye, kyajinga kimye kyami kyapelako.” Waambile mba, “Muchima wami waikala wakosa bingi; Amiwa kechi nantako muchima kwi Lesa ne, kipwilo, nangwa kintu kikwabo ne. Nfinga bataata, pajuba pajuba.” Kabiji aye waambile mba, “Nakonsha kumona mweo wa bamaama na kupya mu ngehena, kiji nobe panyi wakeenke, ne kwikiseka.” Ako ke kufichisha Mupashi Wazhila pa muchima kimye kyapelako. Kilangulukaipo.

257 Twayai tuye Kumuzhi pa byapi bya Nkunda. Twayai twikale Musongwa. Imanai kufuma pa kipona kyenu, inge waya mungi. Iya kuno. Imana papo pa kitapisho ne kwamba mba, “Amiwa naya mungi. Mulongo Branham, Amiwa njina bukaji bwabaya. Nangwa, Ami—Ami—Amiwa naikala bwikalo bwa bulesa. Ami—Ami kechi nakonsha kuuba bibye bintu byo Nguba ne. Mulongo Branham, Nauba *kikye, kyokya*, nangwa *kikwabo*. Amiwa nazhatwa ku bubela. Amiwa nazhatwa mambo akwiiba. Amiwa nazhatwa pa kintu kimo. Amiwa kechi naingijila Lesa mo Nafwainwa kubila ne, kabiji ne Umvwina buvu amiwa mwine, kabiji Nakeba bumi bwami bololwe bulongo. Anweba kechi mwakonsha kundombelela bufuku buno ne, Mulongo Branham?” Amiwa kekala walusekelo kwikyuba.

258 Inge Lesa usakukumbula milombelo yami, kuteleka ku bakolwa, bampofu, ne bamanyikwa, Aye kine ukomvwa mulombelo wa mubi. Kechi mwakonsha kwiya ne kwikala lubaji lwa Musongwa bufuku buno nenyi? Amiwa ne mwita kwiya.

259 Ne musachila, mulongo wami. Nakomoka yewa musango wa kuchichika, wakonsha kwenda ne kuswa kilubo kyanji. Lesa akupeshe, mulongo. Imana ponka *pano*.

260 Mwatazha mukuubula mba, mwakonsha kusutulako kuboko kobe kabiji kwakubula kwikala wa bukishika pa kikye ne? Kika kyamweka ku bantu? Mulongo, lukatazho lweepi? Lukatazho

lweepi na bantu betu mu jino juba? Mwalumbulula mba mwakonsha kusutula kuboko nkobe, amba uji mu kilubo, kabiji wabula kwiya nyi? Kabiji mwayuka mba, “Aye wayuka kuba kyawama, ne kwi kyuba ne, kwi aye kyatama.” Kechi wakonsha kwiya ne?

Kimye wa piyano, inge wakonsha, nyenga, wimba piyano, lwimbo muchechetu.

²⁶¹ Amiwa ne mwita. Nasaka kwimwipuzha anweba. Baanga mu jije jibumba batanwako mu mpwijilo kimye. . . Mwayukatu Amiwa kechi ne musapwishi ne. Amiwa kechi nafundapo ne.

²⁶² Lesa akupeshe, inetu wachepa mubiji. Akya kisenda nsongwakazhi wakine pakuuba mba obe kyokyo. Aje jibumba jicheche jabanyimbi jibena kwiya kuno, emupeshe, nyenga yami. Alo ke lutundaiko lwabaya. Amiwa—Amiwa nakomoka awa inetu muchechetu. Lesa akupeshe, mutemwe. Amiwa njina nsongwakazhi muchechetu ku nzubo, pepi nobe myaka-yenu, Rebekah wamuchechetu. Nakusachila obewa. Nsongwakazhi wa muchechetu mwina India? Lesa emupeshe, mutemwe, awe muchechetu muchechetu ina mfumu. Lesa ekale ne anweba, mutemwe. Obewa, nyenga muchechetu, Lesa ekale ne obewa. Kabiji ne obewa, nyenga.

²⁶³ Pano, talai kuno. Inge bainetu banyike baji byobya, bansongwakazhi babacheche, baji na milanguluko ya bwanyike; kabiji wasapwila byambo bya kwibachibaula, kabiji babwela baiya kuno, kasa bayuka mba baji mu kilubo, baimana kuno ku meso ajibumba na kwisolola. Kine, kine anweba banabakazhi mwakoma, kechi mwakonsha kwiya nenyi? Endai kwiya kuno, kabiji ne kwimana kuno.

Bushe Nakonsha kukeba kilungi Kyenu;
Bukai kilonda kyami, mupashi walajika.

Twayai tumwimbe.

Mpulushai konka ku lusa Lwenu.

Mupulushi, Mupulushi,
Umvwai. . .

²⁶⁴ Kine wi wakishika pa kulomba mulombelo wakwikepesha, “Ngitai mba, Nkambo, ngesekai, mumone kana mujipo kintu kimo kyatama mwi amiwa.”

Kechi mundeke amiwa ne.

Lesa akupeshe, nyenga mutemwe.

²⁶⁵ Baanga muno mu mpwijilo baimana ne kumona, mu jibumba, banabakazhi, banabalume, ne bonsetu, bajikwiya kimye kyo Najikwimana na kulombelela bakolwa, kabiji Mupashi Wazhila wibabula bintu, bya bubi bwabo ne bintu bikwabo, kabiji bayuka? Baanga ba mwi anweba bayuka kyokyo mba kyakine? Kechi kikakalwa ne. Aye Mupashi Wazhila ubena

kumbuula, yeka Mupashi Wazhila umo, amba pajipo kintu kimo muno bufuku buno kyamufichisha pamuchima Aye. Pano, akyo BYOBYAAMBA AYE NKAMBO. Pano, kikumanyai kuno, nangwa Kokwa.

²⁶⁶ Amiwa kechi ne muntu wampewa ku ng'umvwino ya ku mubiji ne. Ine, mwane. Nayuka po Naimana, kabiji Na—Namuyuka Lesa. Abyo ibyo. Muji bavula ba mwianweba bafwainwa kwimana apo paji bansongwakazhi bakyanyike. Pano, kechi mwakonsha kwiya nenyi? Amiwa mbena kwimwita. Amiwa kechi nsakukajikizha ne. Amiwa mbena kwimubulatu.

²⁶⁷ Muntu umo waambile mba, “Amiwa kechi nakyumvwapo lwito lwa kitapisho apo wamwingilo po akajipila jibumba, mu bintu biji byobya ne.”

²⁶⁸ Abyo byobyoyo kyafwainwa kubiwa. Obewa kechi wiiya na jishimikila ja umo walajika muchima ne, maama umo ubena kufwa nangwa kintutu kikwabo. Ako, ke kubila ku mubiji. Akyo Kyambo kya Lesa kyo wishilapo. Obewa kechi wishila ku byakumvwa ku mubiji ne. Anweba iyai kasa mwaketekela mba Lesa ye Lesa, kabiji anweba muji mu nzubo ya Nkambo ya buchibishi bwamambo. Kabiji anweba mwaiya, na kusashijila mambo enu.

²⁶⁹ Lesa emupeshe, mulongo wami, nyenga yami. Nasaka kwimuna kuboko kwenu, naamba mba Nasachila bukishika bwa kushininwa kwenu. Inetu wakepa kamubiji, Nakusachila. Lesa emupeshe. Lekai Aye emupe awa Mupashi wa bukilobo. Akupeshe, mulongo wami. Lesa ekale ne obewa.

²⁷⁰ Jimotu japelako, popo tusa kushika. Kyafwainwa kushikwa kimye kyapelako, ne apo. Mwamona? Amiwa kechi nayuka kimye ne. Naketekela kechi kyafwainwa kubiwa ne. Bino kyakonsheka. Mwamona?

Mupulushi . . .

²⁷¹ Iya kuno, nyenga yami. Nasaka kwimuna kuboko kobe, nakusachila. Nasachila alwa lwitabilo. Alwa ke lwitabilo lwa kine.

²⁷² Iya kuno, mulongo wami. Nakeba kwimuna maboko ne obewa, ponka pano. Nasachila bukishika bobo. Lesa akupeshe.

²⁷³ Iya kuno. Lesa akupeshe. Nasachila bukishika bobo, bwakwimeena ki . . .

. . .kupitaila ne.

Mupulushi . . .

²⁷⁴ Kika? “Masongola a Mwanamukoko afika, ne Musongwa Wanji winengezha Ayemwine.”

. . .kujila kwa kwikepesha;

Mu kimye . . .

Kechi mupitaille ne. (Kika?)

Naketekelatu mu buwame Bwenu,
 Bushe Nakonsha kukeba kilungi Kyenu;
 Bukai kilonda kyami, mupashi walajika, (Apo
 Kyambo po kyachibijile.)

Mpulushai konka ku lusa Lwenu.

Mupulushi, Mupulushi,
 Umvwai kwikepesha kwami. . .
 Byo Mupepula bakwetu,
 Oo, kechi mupitaile ne.

²⁷⁵ Vulukai, Mupashi Wazhila ye wachibakanya mu muchima obe, pakuuba mba wiye kuno. Langulukaitu bifulo byo Achibakanyapo, ne yewa muntu kechi ukekisha ne. Kimye kyonse bakavuluka kyokyo. “Inge michima yetu yabula kwituzhachisha ne.” Pakuuba inge mwaiya na kintu kimo mu Kyambo kya Lesa, kabiji wikipitaile, awo kechi ke Lukunwa wakwa Abulahama ne. Abulahama walamine mulaye wakwa Lesa mu muchima wangi, nangwa kikale byepi nangwa kiye.

²⁷⁶ Nasachila bonse baimana ku kitapisho. Milombelo yami ya kwimulombelela, ke ya kuuba mba Lesa emupe nkebelo ya mu muchima wenu bufuku bunu, kabiji ne kwimulengela kwikala bantu bazhila.

²⁷⁷ Bamo bamubabo banyike, kuno ke bena India, Spanish, Mexico, bonse baimana, bantu baamba mba Benakilishitu, kapepo, pa myaka yavula, bino monai kasa kyaya mungi. Bakeba kwikala bulongo. “Batokwa baumvwa nzala ne kilaka kya bololoke, mambo bakekuta.” Wazhatwa, winengezha kwikyuba bulongo na Lesa, kupichila mu kyakusokelapo bitapisho kya luzhachisho lwa kwa Lesa.

²⁷⁸ Wafwainwa kwikikumanya kuntu kumo, balunda. Obewa wafwainwa kwikikumanya kuntu kumo, nanchi kikumanye kuno. Kechi mupembelele kana lukeelo kelo ne. Obewa wafwainwa kwipaiwa bufuku bunu, mu mapuso, pakuya ku nzubo.

²⁷⁹ Katatakatu ku mbung’eno, Naichile kitapisho, kabiji—kabiji Naichile, nobe kyajinga ku Ohio. Kabiji abwa bufuku, Nafumine mu kishimikwa, nafuminemo pepi nobe mamineti fiftiini. Naumvwine muntu umo kasa abena kujila, ku lubaji lwa mukwakwa. Naimene, naile konka. Motoka wajinga na mapuso, wiimbile mu mukwabo. Kabiji mwanamukazhi waikela popa, wajinga bingi na lubazhibazhi, wavujile kambalaminwe kanji, wajinga bingi na lubazhibazhi. Aye waipailwe. Kabiji waambilenga ku mwanawanji wa mukazhi, mu mukwakwa panshi, ao waendeshenga. Bajinga nanji ponkapa, kasa benengezha kuya ku kipatela. Kabiji bonse babiji bafwaijilwe kwiya ku kitapisho. Kabiji mwaana wamukazhi waambile mba, “Maama, kyambo kyapeleleko kyo aambile kwi amiwa motoka kasa ikyangye kwimpuka, ‘Najikuba kintu kyatama bufuku

buno. Nayuka Amiwa ne kyubile.” Kabiji ponkapa bumi bwanji bwaichilwe.

Oo, mwaamba mba, “Akyo kechi kyakonsha kumweka kwi amiwa ne.” Kyafwainwa. Kyafwainwa.

²⁸⁰ Kabiji byepi inge Mupashi Wazhila kechi ukakuzhachisha jibiji ne kukubuula mba waya mungi ne? Nanchi obewa ukatwela mu Peenape muyewa musango. Kabiji wayuka, na yewa musango wa mupashi, kuuba wikyuba ne. Mwane, talai kunyuma kupita mu bumi bwenu, monai byo mwaikela. Kabiji talai kunyuma kokwa ne kumona kana kuji buwame, bumi bwakwikepesha bwa Kilishitu, nakwendela pamo na Kyambo Kyanji. Inge kechi byokiji ne, nishi iyai mube bulongo. Kuji... Kika—kika kya kupingakenyamo kintu kingi, meulu kasa ayulamo na mapesho a ki pentekosito ao akonsha katoksha muchima obe, ku wamisha mweo obe? Abyo kechi ibyo nenyi?

²⁸¹ Baanga bamingilo baji muno bufuku buno? Nasaka anweba bamo balongo kwiya pamo ne atweba. Akyo kijitu bulongo, mulongo? Ee. Iya kuno, wakonsha nyi, pa mineti umotu, balongo? Abyo ibyo.

²⁸² Yesu waambile, mu Kyambo Kyanji, “Aye umvwa Byambo Byami, ne kumwitabila Aye Watuma, uji na Bumi Bwape; kechi ukeya muginje ne, pakuuba wapitaila kufuma kulufu kuya ku Bumi.” Yoano Wazhila 6 waambile mba, “Kabiji Nkamusangula jibiji mujuba jikapelako,” lusanguko.

²⁸³ Bantu, atweba, twafwainwa kwimana pa kyokyo. Twafwainwa wikyuba. Kyafwainwa kubiwa. Nanchi aye... Kechi ke byakumvwa ku mubiji ne. Byakumvwa ku mubiji byendela amo, nangwa byonkabyo. Abyo ibyo. Pakuuba kine kintu pa kikyee, ke muchima wizhijika.

²⁸⁴ Tolaitu Kyambo kya Lesa, ne kwaamba mba, “Lesa, Naubile kilubo. Mundekeleko mambo Naubile kyokyo. Mwayuka muchima wami byo aji. Naubile kyatama. Ponka pa bino binshika, Nesolola kutamisha kwami. Kabiji kufuma ku buno bufuku, kuya kulutwe, Amiwa na kwatakana ne Anweba. Amiwa ne lubaji lwa Musongwa. Amiwa kechi kooba *kyokyo* jibiji ne; kechi muleke kuzhingila kwami jibiji ne. Amiwa—Amiwa nkooba byubilo nobe inetu. Amiwa nkooba byubilo nobe mwanamulume walumbuluka. Amiwa nkooba bintu byaamba Baibolo mba uba. Amiwa nkemusenda Anweba ponka pano pa Kyambo Kyenu.” Nanchi mubena kuya kuntu kumo.

²⁸⁵ Mwaketekela kyokyo, basapwishi ba Mamboawama? Abo bo Bukine? Abyo ibyo.

²⁸⁶ Pano, twayai tukunyike mitwe yetu mu milombelo, umo umo wa mwi anweba, mujishinda jenu.

²⁸⁷ Vulukai, konka ku lubaji lobe kuji Kilishitu. Kulutwe yenu, kuno ku kitapisho, kwaimana Benakilishitu kasa babena

kulomba. Kunyuma yenu; ba mwingilo wa Mamboawama babena kulomba. Pano, akyo kimubika mu lubaji lwa milombelo.

²⁸⁸ Pano, kwisolola nkobe, mu michima yenu, mu jishinda jenu anweba bene: “Nkambo, Amiwa nalubakanya. Mundekeleko mambo, Nkambo, Naubile bibye bintu. Pano nasolola bubi bwami. Naketekela mwi Anweba. Amiwa nemuswa Anweba pano. Nakeba kwikala lubaji lwa Musongwa. Mu Jizhina ja Yesu Nalomba.”

Pano, lamai kwisolola kwa mu muchima wenu. Pano Mbena kwi mulombelela.

²⁸⁹ Taata wa Mwiulu, byo kifichisha ku muchima bimye bimo inge Natala pa bantu batemwa, kabiji ne kumona Anweba byo musenda Kyambo ne Kwikileta patoka. Kichibatu kufika ku mikolokofwa ya ku kikupa, bino Anweba mwaiya na kwikishinikisha kwikala Kyabukine. Ke Kyabukine.

²⁹⁰ Apo paimana banabalume ne banabakazhi, ne bainetu babacheche, bansongwakazhi babacheche baimana papo na mitwe yo bakunyika, ne mipolo mu meso abo, ponka papelo ya bumi. Naketekela po bafwainwa kupelela, kuya na kwizhonda, kwenda-na-kuzhokoloka, bamanyikwa-kwi satana, jibumba jamanyikwa-na bademona. Baji pano, baimana bufuku bunu na michima ya kunama, na kukeba kintu kimo kyo bakonsha kubikapo maboko abo, kwamba mba, “Nkambo Lesa, ntokeshai kufuma ku bintu byonse bya muntanda.”

²⁹¹ Pano paji banabalume ba myaka-yapakachi, banabalume banyike, banabakazhi bakote, banabakazhi banyike, bonse kasa baimana pamo. Babena kwisolola mba pajipo kyatama. Anweba mwaambile ku michima yabo; inge ne kechi bafwainwa kwikala muno ne. Kyamweshwa mba kechi bakonsha kwimana ne mu bipona byabo ne, kwakubula mfukwiilo ya lengwa kala ne. Mupashi wakwa Lesa wibazhokolokele, kabiji—kabiji waambile mba, “Obewa waya mungi.”

Kabiji bumi bwabo bucheche bwaambile mba, “Nkambo, nanchi Nemukeba Anweba.”

Kabiji diabola waamba mba, “Ikalaitu.”

²⁹² Pakuuba Mupashi wakwa Lesa waambile mba, “Imana.” Kabiji baenda mulukokelo, ne kwimana kuno ku kitapisho.

²⁹³ Pano, nobe byo Nekyambula kwi Anweba Kyambo Kyenu, “Aye ukeya kwi Amiwa, Amiwa kechi kamupange ne. Nangwa bubi bwenu bwikale bwachijisha, bukekala bwatoka nobe mabebe amashika; achila nobe mashi, atoka nobe booya bwa mukoko. Iyai mupote kwi Amiwa, waini ne manyi. Lusa lwami lwafikilamo. Aye umvwa Byambo Byami, ne kumwitabila Aye watuma Ami, uji na Bumi bwa myaka; kabiji kechi ukeya mu Kinje ne, pakuuba wapitaila kufuma kulufu kuya ku Bumi.

Kabiji pano masongola a Mwanamukoko afika, ne Musongwa winengezha Ayemwine.”

²⁹⁴ Taata, abo ke Benu. Ke michinya ya Kyambo Kyenu. Baji kuno na komvwewa na meema a mu Kyambo, mambo ke Mamboawama apwijijika. Kechi kushako kintu kiji kyonse ne. Kichibakana, kufika ne ku kifulo kya sukuulu wa banyike. Kibena kutumpaula mizhazhi, mizhazhi ya bululu, aya—aya—aya mizhazhi ya lupusano, mizhazhi ya ntanda. Bafumyaimo, Nkambo, konka ku Mupashi Wazhila. Bapangaimo mu baabo bantu.

²⁹⁵ Ne bakabila kwikala ke benu Anweba bufuku buno, Yesu, nobe Byenu byabunoshi, nobe bunoshi Bwenu, nobe bamembala ba Musongwa Wenu. Nakabila bumi bwabo. Nalomba na muchima wami yense, na babo bamingilo, abo bakalume ba Lesa mumi. Nalomba mba Anweba bifumyai kwi abo, Nkambo, bintu bya muntanda, kabiji ne kwibapa kuchichika kwa kwimana ku meso akwa Satana. Kiswishai kye, Nkambo. Twaketekela mba Anweba musakwiyuba. Anweba mwaambile mba, “Ipuzhai Bataata kiji kyonse mu Jizhina Jami, Amiwa ke kyuba.” Bino, Anweba kechi mwaambile mba, “Uu, kapepo Amiwa ke kyuba.” Anweba mwaambile mba, “Amiwa ke kyuba.” Kabiji Naketekela mba kya kine.

²⁹⁶ Pano, kabiji kyanembwa mu Binembelo, “Mu Jizhina Jami bakapangilamo bademoni.” Ke diabola wakonsha kutola inetu wakyanyike nangwa mwanamukazhi, ne konauna bumi bwanji. Ke diabola wakonsha kutola mwanamulume ne konauna bumi bwanji. Kabiji Nsaakwambula jije jishimikila jicheche, Nkambo, mu milombelo yami. Kabiji Nalomba mba Anweba musakung’umvwa, kabiji musakumbula milombelo yami, amba uji yense wabaabo wakabilwa bufuku buno kwikala bunoshi bwa Bufumu. Baiya. Kabiji Nafwainwa kukumbula ku byambo byami bufuku buno. Kabiji baiya na kwimana pamo ne amiwa, ne kutola bifulo byetu bya kulubaji lwa Kilishitu.

²⁹⁷ Pano, Satana, walusa kala. Walamawizha bamo bacheche, bino kechi washinda nkondo ne. Yesu waambile mba, “Aye wiya kwi Amiwa, Amiwa kechi nkamukana ne.”

²⁹⁸ Satana, Naamba kwi obewa, amba juba jimo kwajinga nsongwalume wamucheche wafungilenga mikoko ya bashanji. Kabiji bukwe wayishile watolapo umo, wamusenda, na kumumanyika, kabiji wayilenga na kumuja. Bino awe kafunga mucheche, aye kechi wajinga na byavula ne kanatu malekenyi, bino wajinga na lwitabilo mwi Lesa mumi. Aye waile panyuma ya yewa bonkwe, kabiji wamukwachile, kabiji aye—aye wamwipaile. Aye wamwimejile, ne kumukwata ku myevu yanji ne ku mwipaya. Wamwangachile mukoko kufuma mukanwa kanji, wa mubwezechize ku munyevu pakuuba mba abukwe.

²⁹⁹ Obewa watola iye mikoko yawama yakwa Lesa, abo bainetu, awo wibalengela kuluka suki yabo ne kumvwala bya kwikobaika kobaika, kabiji byamweka nobe byobya bintu Baibolo byo azhachisha, kabiji walangulukile mba uji nabyo. Bino Naiya na ao malekenyi acheche a milombelo. Amiwa mbena kwibaleta bufuku buno. Obewa kechi wakonsha kwibakwachijila kikupu ne. Obewa walusa nkondo. Abo bantu bawama baimana papo, banabamikoko ba Lesa, balekeleko. Twakupanga obewa, mu Jizhina ja Nkambo Yesu Kilishitu. Nabika pakachi ka byubilo ne kuzhingila, kabiji ne byubilo byatama, kabiji ne byonse byo byafwainwa kwikala, Nabika Mashi akwa Yesu Kilishitu, koka kulwitabilo, pakachi kabo ne kyokya kintu ne jikwabo. Obewa kechi ukebakwatapo jibiji ne. Baji mu munyevu wa Bataata. Abo ke baana Banji. Fumaiko kwi abo. Mu Jizhina ja Yesu Kilishitu, Nakukambizha obewa.

³⁰⁰ Kechi kujipo diabola mu kalunga kabafu wakonsha ku kukwata ne, inge wakonsha kuketekela kyokyo. Obewa wamvwetwa na Mashi. Wazhokolokwa na milombelo, bamingilo ba Mamboawama, kabiji ne baluwe ba lulayang'ano, milombelo. Anweba bonse mwaimana papo, iyai kuno, byo mwayuka mba mwajinga na byubilo, bilubo, kabiji ne bintu byo mwaumvwinanga buvu. Inge pano mwibibika pa kitapisho kya lubemba kya kwa Lesa kya buchibishi bwamambo, kabiji kiketabilwa pano nobe lulekelo lwa mambo obe, amba Kilishitu wapana kwi obewa, wakonsha kupana kyokyo konka ku lwitabilo, sutulaiko kuboko kwenu ne kwamba mba, "Amiwa pano ne kiswa. Kyaya. Kabiji kufuma pa jino juba, Amiwa kechi ke kyuba jibiji ne"? Obewa wapuluka monka mu Mashi akwa Yesu Kilishitu. Amena. Amena. Jitotwe ja Lesa.

Bushe kujipo mukwabo wafwainwa kwiya, na kwitungako ku jije jibumba?

³⁰¹ Bushe mujipo wakolwa mu kishimikwa, wafwainwa kwimana na kumulombelela pa kyonka kino kimye? Imanaiko.

³⁰² Nakeba umo muno wa mwi anweba kuno, inge kechi byo uji ne—inge kechi wi membela wa kipwilo kya Mamboawama ne, yaanga ku umo, awe inge wakonsha kuuba, inge wikala pepipepi papo. Yanga kwi bakafunga ne ku batizhiwa. Kabiji inge kechi mwatambula Mupashi Wazhila ne, twalomba Lesa emupe Mupashi Wazhila kabiji ne kwimuyuzha, anweba mwikale membala wa Musongwa.

³⁰³ Talai kubushiya kokwa, balongo, pa bantu bakolwa. Aye diabola kechi wakonsha kukwachijila booba bantu ne. Akye ke kimye kyakukasuluka. Aleluya! Anweba mwaketekela kyokyo nyi?

Twayai tukunyike mitwe yetu tulombe.

³⁰⁴ Kabiji anweba bonse bantu muji koko, baji na misongo, anweba mwaimana, tetekai maboko enu umo pa mukwabo.


Yesu Kilishitu waambile mba, “Abye biyukilo bikebalondelanga baitabila. Inge bateteka maboko abo pa bakolwa, bakakosa.” Kwachijilai maboko enu pa umo ne mukwabo. Pano, kechi mwilombelele anweba bene ne. Obewa lombelela muntu walondelapo po wabika kuboko nkobe, mambo abo babena kukulombela.

Twayai tulombele pano nobe Kipwilo kya Bwinakilishitu.

³⁰⁵ Nkambo Yesu, twasachila lushijilo bufuku buno, myeo ibena kwiya kwi Anweba. Pano, diabola wasenda mikoko Yenu, na misongo. Twaiya na kwibangata. Kabiji nobe Kipwilo kya Lesa mumi, twakajipila diabola, ne kwamba mba, “Lekako baabo bantu bakolwa, Satana. Twakupanga mu Jizhina ja Yesu Kilishitu, pakuuba mba babukwe.” Aye Baibolo waamba mba, “Abye biyukilo bikebalondelanga baitabila. Inge bateteka maboko abo pa bakolwa, bakakosa.” Awo ye mulaye wakwa Lesa, kabiji twayuka mba kyakine. Abo batambula lubuko monka mu bipumo bya Nkambo Yesu Kilishitu.

³⁰⁶ Pano, inge mwikiketekela, sutulaiko maboko enu ne kumutakaika Aye. Amena.

³⁰⁷ Kijitu bulongo, kafunga, byonse ke byobe. Lesa akupeshe, mulongo. Nanchi kyawama bingi kwikala nenu bufuku buno. Lesa ekale ne anweba.

Lesa emupeshe, balongo kuno. 

62-0121E Masongola A Mwanamukoko
Tabbanako Waluvwang'ano lwabupopweshi
Phoenix, Arizona U.S.A.

KAONDE

©2025 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org